

JOSUÉ

Hum tz'ib'nheb'ilkano yu ya' Josué

1. CHI'OKKANO TX'OTX' CANAÁN YU EB'NAJ ISRAEL

(1:1—12:24)

Iswatx'e isb'a eb'naj Israel yinh tzet chiyu isq'oji
eb'naj yinh anma ay b'ey Canaán

1 ¹Hayet lahwi iskamto ya' Moisés, ischejab' Komam Dios, istzotel Komam tet ya' Josué, isk'ahol ya' Nun; ya' Josué tu' ischejab' ya' Moisés yehi. Yalni Komam tet ya' Josué haka' ti': ²«Wal tinanh xakam ya' Moisés inchejab'an, yuxin hach ti' chawijb'ato konhob' Israel yinh isb'el, chaxhq'axponik'to yib'anh ha' Jordán yeb'i, kat heyapni sat tx'o tx'otx' chiwaq'an teyet hex Israel hex ti'» ³Haka'tik'a yu walnihan tet ya' Moisés; sunil tx'o tx'otx' b'ay chila-kexek'i, b'ay cheyayo heyoj, haninan chiwaq'kanojan tx'otx' teyet. ⁴Sunil tx'otx' ay b'ey tx'otx' desierto, yeb' tx'otx' Líbano masanta chi'apni yinh ha' niman Éufrates chiwaq'an teyet; chiwaq'nipaxojan sunil istx'otx' eb'naj hitita teyet masanta chi'apni yinh ha' Niman Mar^b yetk'ulal b'ay chito tz'ayik. ⁵Yulb'al tiempo ay hakawil yul sat yib'anhq'inal ti', machi hunu mak chiq'oji tawinh; ayinnhetik'akojan hawetb'ihoy haka' yu wokan yetb'ihoy ya' Moisés; machi b'aq'inh chaxhinb'ejkanojan, mach chachkan hachukil yinh hunel-nhe. ⁶Ako hawip, mach chachxiwi, yuto hach chapohkanh tx'otx' yinh eb'naj Israel, tx'otx' halteb'il tet heyichmam ta chiwaq'an teyet. ⁷Hanche ti' chinq'an-an tawet ta chawako yip hawanma, mach chaxhxiwi, chayije sunil chejb'anile halb'ilkano tawet yu ya' Moisés, ya' inchejab'an. Mach chahek'ilo hab'a yinh; mach chaxhto yinh hawatx'q'ab', mach chaxhto yinh hamekq'ab' yinh sunil

^a 1:2 Haxa ya' Josué ok ijb'alomalo yinh anma Israel seleso ya' Moisés, ha' ya' chi'inikto anma Israel sat tx'otx' Canaán, sayb'ilxalo ya' yu Komam Dios. Nm. 27:18; Dt. 1:38.

^b 1:4 Ha' Niman Mar, ha' ton ha' Mar Mediterráneo.

tzet chiyala, hak tu' xin k'ul chacheliko yinh sunil tzet chawatx'e. ⁸Machojab' chab'ej hawawten Istzoti' Komam Dios ayko yinh hum; tz'ayikal yeb' aq'b'alil ch'iek' hanab'al yinh yu hayijeni, haxinwal k'ul chi'eliko sunil tzet chawatx'e. ⁹Ab'e tzet chiwalan, hanin haDiosal inti'an. Chiwalan tawet; ako yip hawanma, helan chawute hab'a, mach chaxxhiwi, mach chikab'kon hak'ul yuto haninan haDiosal yeb' haWahawil, chinokan hawetb'ihoj b'ajxanhetu'wal chachtohi,» xhi Komam.

Iswatx'e isb'a ya' Josué isto yinh howal

¹⁰Lahwi tu', istzotel ya' Josué tet eb'naj yahawil xol anma Israel, yalni ya': ¹¹«Asi'we xolaj campamento kat heyalni tet konhob' tato chiswatx'e tzet chislo chiyitoj, yuto yet oxeb' tz'ayik chonhq'axponik'to yib'anh ha' Jordán ti', kat kotoh b'ey tx'o tx'otx' chaq' Komam Jahawil, koDiosal jet, kexchi,» xhi ya' Josué.

¹²Istzotelpaxo ya' Josué tet eb'naj Israel, eb'naj titna yinh ya' Rubén, yeb' tet eb'naj Israel titna yinh ya' Gad, yeb' tet yikta majan eb'naj Israel titna yinh ya' Manasés, yalni ya' Josué haka' ti':

¹³—Chenatij tzet halb'ilkano yu ya' Moisés, ischejab' Komam Dios teyet, yet yalni ta ha' Komam Jahawil, koDiosal, aq'nikano tx'o tx'otx' ti' teyet yu hexew sat tx'otx'.^c ¹⁴Kanojab'kano heyixal, heyuninal yeb' henoq' sat tx'o tx'otx' yaq'kano ya' Moisés teyet ti', tx'otx' ayik'ti isq'axeb'ik'ti ha' Jordán ti'; yaja' wal hex kaw helan hex heto yinh howal, iq'we hemunlab'al yet howal, kat heb'ab'i sata hunteq'anxa jet konhob' yu hekolwa yinh. ¹⁵Hato xin yet chiyaq'nikano Komam b'ay chixew eb'naj haka' yu Komam teyinh, masanto yet chaq'nikano Komam istx'otx' eb'naj, katto hepaxti sat hetx'otx' ay isq'axeb'ik'ti ha' Jordán ti', tx'otx' ayko yetk'ulal b'ay chi'ahilo tz'ayik, yu heyokkano yahawo tx'otx', tx'otx' yaq'kano ya' Moisés ischejab' Komam Dios teyet, xhi ya' tet eb'naj.

¹⁶Istaq'wi eb'naj tet ya' Josué:

—K'ultik'a, chikowatx'ehanh tzet chawal ti', kat kotohanh b'ay chonh-hachejto ti'anh. ¹⁷Chixin koyijehanh tzet chawal jetanh haka' yu koyijenanh tzet yal ya' Moisés. Ha' xin hune' tzet chijochehanh ta chi'ok Komam Dios koDiosal hawetb'ihoj haka' yu yok Komam yetb'ihoy ya' Moisés. ¹⁸Makxanhetik'a mach chisyije tzet chawala, maka chismanhk'o tzet chawal ti', yilal yaq'lax kamoj. Hach kachannhe ako yip hawanma, mach chaxxhiwi, xhi eb'naj.

Ischejto ya' Josué kawanh eb'naj yilno konhob' Jericó

2 ¹Hayet ay ya' Josué, isk'ahol ya' Nun b'ey konhob' Sitim, ischejni-to ya' kawanh eb'naj Israel yu isto eb'naj yinh ewantajil yilno tx'o

^c 1:13 Hune' xewilal yalte Komam Dios, hato yet yokto anma Israel sat tx'otx' Canaán, hato tu' yaq' Komam Dios xewilal tet anma Israel; yet lahwi yek' chejab'o b'ey Egipto, lahwi tu' yek'paxo sat tx'otx' desierto.

tx'otx' yeb' konhob' Jericó, yalni ya' tet eb'naj: «Asi'we ilwek'o tx'o tx'otx', kat kam heyilni konhob' Jericó,» xhi ya'.^d

Lahwi tu' isto eb'naj, yapni eb'naj, isq'anni eb'naj b'ay chiway b'ey yatut hune' ix ix tx'oj ye iswi', chiyij Rahab.^e ²Yaja' xin ay mak b'ey halno tet naj isreyal konhob' Jericó tu' haka' ti':

—Mamin, ha' yinh hune' aq'b'al ti', ay eb'naj Israel mahul ilno kotx'otx', xhi eb'naj.

³Ischejnito naj isreyal konhob' Jericó tu' yalno tet ix Rahab haka' ti':

—Chejilti eb'naj Israel mahul isq'ana' b'ay chiway b'ey hawatut ti', kat hawaniko eb'naj yul inq'ab'an, yuto tonhe chihul eb'naj yila' kotx'otx' ti', xhi eb'naj chejab'.

⁴Yaja' xin eb'ab'ilxato eb'naj kawanh yu ix; yalnito ix tet ischejab' naj rey haka' ti':

—Yeli ay eb'naj mahul isq'ana' b'ay chiwayi, yaja' mach wohtajojan b'ay ay eb'naj. ⁵Yaja' yet maq'ejb'ayoj yet lanhanxa ispeb'alax ispultahil konhob' ti', mato eb'naj, yaja' xin mach wohtajojan tzet b'ehal maschato eb'naj; asi'we yinh anhe hetzujuyo eb'naj tinanh, chito tzujchayo eb'naj heyu, xhi ix.

⁶Yaja' xin yihto ix eb'naj yib'anh yak'alil yatut, yeb'anto ix eb'naj xol tx'i'al topan te' lino ayahto tajo b'ey tu'.

⁷Hak tu' yu isto eb'naj issoldado naj rey saywal yinh eb'naj yulaj b'eh chito b'ey ha' Jordán, masanta isti' ha', b'ay kawil yehati yich ha'. Hayet yelto eb'naj soldado istzujnoyo eb'naj tu', ispeb'alaxkano ispultahil konhob' Jericó. ⁸Hayet maxhto chiwaykanh eb'naj kawanh Israel tu', yahto ix Rahab yib'anh yak'alil yatut b'ay ayahto eb'naj, yalni ix tet eb'naj:

⁹—Kaw wohtajan ta xayaq' Komam heYahawil tx'o tx'otx' ti' teyet, yuxin hul hune' xiwkilal jib'anhanh yu Komam. Kaw sunil anma ay yul hune' konhob' ti', lanhan ispax yip yu xiwkilal teyet. ¹⁰Xajab'ehanh isq'umal tato yet heyel yul konhob' Egipto ispohni Komam heYahawil ha' Kajinh Mar yu heyek'to yiktab'al ha' yul b'eh tajin. Jab'enpaxojanh tato hetanhtzelo kawanh eb'naj isreyal anma amorreo; anma ay isq'axeb'ik'to ha' Jordán, ha' ton naj Sehón yeb' naj Og. ¹¹Hayet jab'enanh isq'umal tu', kaw konhxiwkanokanhanh, yuxin machi hunu mak ti' chiq'oji yaniko howal teyinh, yuto heYahawil hex ti', ha' ton Komam Dios isDiosal satkanh yeb' isDiosal sat tx'o tx'otx' ti'. ¹²Yuxin chinq'anan teyet tato cheyaq' b'inaho isb'i Komam heYahawil, cheyalni tato chexkolwa

^d 2:1 Tx'otx' *Sitim* ayko tx'otx' isq'axeb'ik'to ha' Jordán, yinh yetk'lulal b'ay chi'ahilo tz'ayik, sat ak'al Moab ayayo tx'otx'; ha' tu' xin ehayo eb'naj Israel yet toxa chi'okto eb'naj sat tx'otx' Canaán. Nm. 25:1; Jos. 3:1. ^e 2:1 *Rahab* isb'i hune' no' niman noq' chi'ek' xol ha' mar. Chijil tzoti' yinh no' yinh ej yik'ti' eb'naj hebreo. Heb. 11:31; Stg. 2:25; Sal. 89:10.

winhan yeb' mak ay yu inmaman yul watutti'an, haka' mayu inkolwahan teyinh. Aq'we hunu yechel wetan chiyeniloj ta kaw yel cheyala, ¹³ta chekolkkanilo inmaman yeb' inmi'an yeb' sunil eb'naj innohan yeb'paxo eb'ix innohan, yeb' sunil yuninal. ¡Mach chonhhetanhtzelojanh! xhi ix.

¹⁴Istaq'wi eb'naj tet ix:

—Chijaq' kob'ahanh tawinh, tanhe machi b'ay chawalik'o hune' ti'. Hayet chaq'ni Komam Jahawil tx'o tx'otx' ti' jetanh, k'ul chijute ko-b'ahanh tawinh, chachkokolilojanh, xhi eb'naj tet ix.

¹⁵Ix Rahab tu', ayko yatut ix yinh isk'ub'al konhob', yuxin yul wentanah yalti ix eb'naj yinh hune' lasu. ¹⁶Hayet maxhto chi'ayti eb'naj, yalni ix tet eb'naj:

—As eb'awe heb'a iswi' witz, haxinwal mach chexilcha yu eb'naj to kexsaynoj, wal xin cheyeb'a heb'a oxeb' tz'ayik b'ey tu' masanto yet chimeztzo eb'naj elto kexissaynoj. Lahwi tu' kat heto yinh heb'el b'ay ay hex, xhi ix tet eb'naj.

¹⁷Istaq'wi eb'naj tet ix:

—Hanhonhti'anh chikoyijehanh tzet makotaq'we jub'anh tawinh. ¹⁸Yuxin yet chonhhulanh janokojanh howal yinh konhob' ti', chalokb'ayto hunu lasu kaj ti' yul wentanah b'ay chonhayto t'unhno ti'anh; kat hakutxb'an hab'a yeb' hamam, hami', yeb' sunil hanoh, yeb' sunil mak ayto hawu hab'a yeb' b'ey hawatut ti'. ¹⁹Tato ay hunu mak chi'elto yul nha ti' yet ayko howal kat iskam juhanh, yinh haka' tu' machi ok iskamikal tu' komulojanh, yuto ha' chisayni kamikal yinh; yaja' ta ayikti yul nha ti', kat iskam juhanh, yinh haka' tu' chi'ok hune' tu' komulojanh. ²⁰Yaja' ta chawalilo hune' ti', wal tu' matxa yilalo chikoyijehanh tzet chijaltekanojanh tawet ti', xhi eb'naj.

²¹Istaq'wi ix:

—K'ultik'a haka' heyalni ti', xhi ix.

Istaq'likano eb'naj tet ix, isto eb'naj. Lahwi tu' isximnikaniko ix hune' tx'anh lasu kaj jilni yinh isventanahil yatut.

²²Isto eb'naj kawanh Israel tu' yeb'ano isb'a iswi' witz, yehayo eb'naj oxeb' tz'ayik b'ey tu', masanto yet ismeltzo eb'naj soldado b'ey saywal yinh eb'naj. Kaw xin sunil b'ay ek' eb'naj soldado tu' saywal yinh eb'naj, yaja' machi ilcha eb'naj yu eb'naj. ²³Lahwi tu', yayti eb'naj kawanh Israel tu' iswi' witz, isq'axponik'to eb'naj yib'anh ha' Jordán, yapni eb'naj b'ay ay ya' Josué, isk'ahol ya' Nun. Yichiko eb'naj yalni sunil tzet b'ey eb'naj yila' b'ey tu'. ²⁴Yalni eb'naj tet ya' haka' ti': «Xayako Komam Dios Jahawil tx'o tx'otx' tu' yul koq'ab', yuto sunil anma ay yul konhob', lanhan ispax yip yu xiwkilal jet,» xhi eb'naj.

Yet isq'axponik'to eb'naj Israel yib'anh ha' Jordán

3 ¹Haxa yinh hune'xa tz'ayik, yinh kaw sahab' sak'ayal yel ya' Josué yeb' sunil anma Israel b'ey tx'otx' Sitim, yapni eb'naj isti' ha'

Jordán, yaja' mach q'axponik'to eb'naj yib'anh ha' yinh hune' tz'ayik tu', wal xin kantokano eb'naj isti' ha'. ²Haxa yinh yox tz'ayik yek' eb'naj yahawil konhob' Israel xolaj campamento, ³yalni eb'naj chejb'anile tet anma Israel haka' ti': «Hayet cheyilni yek'to isKaxhahil istrato Komam Dios iq'b'il yu eb'naj sacerdote, eb'naj titna yinh ya' Leví, xol ha' Jordán, chexel b'ay ay hex, kat heyok tzujno yintaj. ⁴Hak tu' chu heyohtanhenilo b'ay kaw hetohi, yuto maxhto hunujex xakexek' yul b'eh tu' yet yalanhtokanoj. Yaja' mach chexhitziko yinh isKaxhahil isTrato Komam,^f wal xin nahat chexkantzujnoj, hune' kilómetro chexkan tzujno yintaj,» xhi eb'naj.

⁵Yalni ya' Josué tet konhob' Israel: «Wal tinanh sajnheve heb'a, yuto yet hekal cheyil iswatx'en Komam Jahawil k'ayb'alk'ule koxol,» xhi ya'. ⁶Yalnipaxo ya' Josué tet eb'naj sacerdote: «B'atxwekanh isKaxhahil isTrato Komam, kat heyek'to yeb' te' xol ha' sata sunil anma ti',» xhi ya'.

Isb'atxnikanh eb'naj te' kaxha tu', isb'ab'i eb'naj sata sunil anma.

⁷Lahwi tu', istzotel Komam tet ya' Josué, yalni haka' ti': «Ha' yinh hune' tz'ayik ti', chi'ichiko wanikojan hamay yul sat anma Israel, hak tu' chu yohtanheniloj ta ayinikojan hawetb'ihoj, haka' yu wokan yetb'ihoy ya' Moisés. ⁸Wal hach xin chachej eb'naj sacerdote ta chisb'atxto eb'naj te' isKaxhahil inTratohan, hayet ch'ayto eb'naj isti' ha' Jordán tu' xin, kat yok linhno eb'naj xol ha',» xhi Komam.

⁹Lahwi tu', yalni ya' Josué tet konhob' Israel: «Hitzanhwetij, kat heyab'en tzet chiyal Komam Jahawil, koDiosal, ¹⁰yu tzet cheyil tinanh, ha' chi'aq'no heyohtanheloj tato ayko Komam Dios itzitz koxol, kat xin yinilo Komam anma cananeo yinh kosat, yeb' anma hitita, yeb' anma heveo, yeb' anma ferezeo, yeb' anma gergeseo, yeb' anma amorreo, yeb' anma jebuseo. ¹¹Tinanh xin, ha' te' Kaxha yet ist'inhanil istrato Komam Dios, Yahawil yinh tx'o tx'otx', ha' chib'ab'ayto xol ha' Jordán kosataj. ¹²Yuxin sayilo 12 (kab'lahonhwanh) eb'naj Israel, hunun eb'naj yinh hunun majan yik'al ya' Israel. ¹³Hayet chiyamayto yoj eb'naj sacerdote, eb'naj iq'nhe te' Kaxha yet istrato Komam Jahawil, Yahawil yinh tx'o tx'otx', xol ha' Jordán, kat ispohni isb'a ha', yuto ha ha' chib'elwi yayiloy chislinhb'a isb'a, kat islatz'b'ankanh isb'a ha' haka' k'ub',» xhi ya' Josué tu'.

¹⁴Lahwi tu' xin yinikanh anma Israel yatut watx'eb'il yinh q'ap q'ap yu yek'to anma xol ha' Jordán, b'ab'el xin eb'naj sacerdote iq'nhe te' Kaxha yet isTrato Komam sata anma. ¹⁵Hayet yichiko yokto eb'naj sacerdote xol ha', ischak'amb'i yoj eb'naj yu ha ha' isti' ha' tu'; hunteq'an tz'ayik tu' b'ay chik'uplaxkanh ixim trigo, kaw chich'ib'kanh ha' Jordán. ¹⁶Haxa ha ha' chi'ayilo yib'anh, islinhb'a isb'a ha', islatz'b'akanh isb'a ha', kaw xin nahat to ha' yetk'ulal konhob' Adán, iskawilal Saretán. Haxapaxo ha' ay

^f 3:4 Ha' hune' isKaxhahil isTrato Komam ha' ton Arca del Pacto ayko xol eb'naj Israel, ha' chiyeniloj ta ayko Komam Dios yetb'ihoy eb'naj, 2Sam. 6:7,9.

yalanh xin, tokano ha', masanta apnikano ha' xol ha' Mar Kamom. Hak tu' xin yu ispohni isb'a ha' Jordán tu', yek'to anma Israel yiktab'al ha' yul hune' b'eh tajin, satak'ti konhob' Jericó. ¹⁷Wal eb'naj sacerdote iq'nhe isKaxhahil isTrato Komam, ok linhno eb'naj b'ay tajin yiktab'al ha' Jordán, hak tu' xin yu yek'to sunil anma Israel yiktab'al ha' b'ay tajin.

Kab'lahonheb' ch'en ch'en ch'aq'ni is nab'ati eb'naj Israel

4 ¹Hayet lahwi yek'kanto anma Israel isq'axeb'ik'to ha' Jordán, yalni Komam Dios Jahawil tet ya' Josué: ²«Sik'lelo 12 (kab'lahonhwanh) eb'naj winaj xol eb'naj Israel; hunun eb'naj yinh hunun majan eb'naj. ³Kat hawalni tet eb'naj ta chiyihti eb'naj kab'lahonheb' ch'en ch'en xol yiktab'al ha' Jordán, iskawilal b'ay linhan eb'naj sacerdote, kat yiniti eb'naj ch'en kat isb'ulb'anayo eb'naj ch'en b'ay chekankano hune' aq'b'al ti!» xhi Komam.

⁴Lahwi tu', yawtenti ya' Josué eb'naj 12 (kab'lahonhwanh) issik'lelo tu', hunun eb'naj yinh hunun majan eb'naj Israel. ⁵Yalni ya' tet eb'naj: «Ayanhweto satak'ti isKaxhahil isTrato Komam Dios Jahawil ayko yiktab'al ha' Jordán, kat heyahnato hunun ch'en yib'anh hewixik', hunun ch'en yinh hunun majan eb'naj Israel, hak tu' xin kab'lahonheb' ch'en yinh sunil. ⁶Ha' ch'en tu' chi'ok yecheloy yu hetxumnilo yinh tzet yu heyek'to yul hune' b'eh yiktab'al ha'; yeb' yet chisq'amb'en heyuninal teyet yet b'aq'inh haka' ti': «¿Tzet chal yelapno hunteq'an ch'en ch'en ti?» ta xhi.⁸ ⁷Kat heyalni tet: “Hayet yek'to isKaxhahil isTrato Komam Jahawil xol ha' Jordán, ispohni isb'a ha' sata isKaxha Komam, yuxin ha' ch'en ch'en b'ulanayo ti' ayko yechelo yinh tzet iswatx'e Komam jinh hanhoh Israelonh ti'» kexchi,» xhi ya' Josué.

⁸Isyijen eb'naj tzet yal ya' Josué tu', yinahti eb'naj kab'lahonheb' ch'en ch'en b'ay ispoh isb'a ha' Jordán tu', hunun ch'en yinh hunun majan eb'naj Israel. Yinito eb'naj ch'en b'ey campamento, isb'ulb'ankanh eb'naj ch'en haka'tik'a yu yalni Komam Dios tet ya' Josué. ⁹Ischejnipaxo ya' Josué b'ulb'alaxokanh 12 (kab'lahonheb'xa) ch'en ch'en yul ha' Jordán, b'ay ok linhno eb'naj sacerdote iq'nhe isKaxhahil isTrato Komam. Hunteq'an ch'en ch'en tu' b'ulankanokanh ch'en xol ha' Jordán tinanh.

¹⁰Hayet linhaniko eb'naj sacerdote iq'nhe te' isKaxha Komam Dios yiktab'al ha' Jordán, isyijen anma Israel sunil tzet yal Komam tet ya' Josué, yijnipaxkano isb'a sunil tzet yalkano ya' Moisés tet ya' Josué tu'. Ha' anma Israel, kaw yinh anhe ek'to yiktab'al ha' Jordán. ¹¹Haxa yet xa'ek'to sunil anma Israel isq'axeb'ik'to ha' xin, yek'paxto eb'naj sacerdote iq'nhe isKaxha Komam. Lahwi tu', isb'ab'i eb'naj sata sunil anma Israel. ¹²Ek'paxto eb'naj soldado Israel titna yinh ya' Rubén yeb' yinh ya' Gad, yeb' yikta majan eb'naj titna yinh

ya' Manasés. Sunil eb'naj soldado tu', iq'b'il isch'en eb'naj yet howal, b'ab'i xin eb'naj sata sunil anma Israel, haka'tik'a yu yalnikano ya' Moisés. ¹³Aymi 40 mil isb'isil eb'naj soldado yet howal b'ab'i sata isKaxha Komam Jahawil, yapnikano sunil anma Israel tu' sata Komam Jahawil, satak'ti konhob' Jericó.^h ¹⁴Yinh hune! tz'ayik tu', kaw niman yelapno elkaniko ya' Josué yul sat sunil anma Israel yu Komam Dios, wal xin yijem yute isb'a anma Israel tet ya', haka' isyijemal tet ya' Moisés yulb'al hunteq'an hab'il ehik'o ya'.

¹⁵Lahwi tu', istzotel Komam Dios tet ya' Josué, yalni Komam: ¹⁶«Hal tet eb'naj sacerdote iq'nhe Kaxha yet isTrato Komam tato chi'ahti eb'naj xol ha',» xhi Komam.

¹⁷Wal ya' Josué yal ya' tet eb'naj sacerdote haka' ti': «Ahanhweti xol ha' Jordán,» xhi ya'. ¹⁸Hayet yel eb'naj sacerdote iq'nhe isKaxha Komam Jahawil yiktab'al ha' Jordán, yanayo eb'naj yoj yib'anh tx'o tx'otx' tajin ayko isti' ha', yichiko ha' Jordán tu' isb'elwi yul isb'eh hunelxa, isnohkanh ha' yul isb'eh haka'tik'a ye yet yalanhtokanoj.

¹⁹Ha' yinh 10 (islahonheb') tz'ayik yinh b'ab'el ixahaw yek'to anma Israel yul ha' Jordán, yapni b'ey Gilgal, satak'ti Jericó, yinh yetk'ulal b'ay chi'ahilo tz'ayik. ²⁰Ha' b'ey tu' xin, islatz'b'akanh ya' Josué ch'en kab'lahonheb' ch'en ilaxahti yul ha' Jordán. ²¹Yalni ya' Josué tet eb'naj Israel: «Yet b'aq'inhal yet chisq'amb'en heyuninal teyet: “¿Tzet chal yelapno hunteq'an ch'en ch'en ti'?” ta xhi. ²²Cheyal tet heyuninal yinh tzet chal yelapnoj: “Hanhonh Israelonh ti' konhek'to yul hune! b'eh tajin yiktab'al ha' Jordán ti',” kexchi. ²³Cheyalni tet heyuninal yinh tzet yu ispohni Komam Jahawil koDiosal ha' Jordán, jek'tojanh kosunil yul hune! b'eh tajin, haka' yu ispohni Komam Jahawil ha' Kajinh Mar yet jek'to yiktab'al ha'. ²⁴Hak tu' chu yohtanhenilo anma ay yul sat yib'anhq'inal ti' tato kaw aykano yip Komam Dios. Haxa hex ti' xin yilal hexiw tet Komam Jahawil, koDiosal yinh sunilb'al tz'ayik,» xhi ya' Josué.

Alaxiko circuncisión yinh eb'naj Israel b'ey tx'otx' Gilgal

5 ¹Sunil eb'naj isreyal anma amorreo ay isq'axeb'ik'ti ha' Jordán, ay yinh yetk'ulal b'ay chito tz'ayik, yeb' eb'naj isreyal anma cananeo ayayo iskawilal isti' ha' Mar Mediterráneo yab'elo eb'naj isq'umal tato ispoh Komam ha' Jordán, istajayto ha' b'ay ek'to anma Israel. Hayet yab'enilo eb'naj hune! tu', isxiwkanokanh eb'naj, machi xin hunu eb'naj islinhb'a isb'a yaniko howal yinh eb'naj Israel.ⁱ

²Yinh hunteq'an tz'ayik tu', tzotel Komam Jahawil tet ya' Josué, yalni Komam haka' ti': «Watx'e hayeb'o ch'en ch'en chililon chawuteti yeh haka' ch'en cuchillo, kat hawaq'ni circuncidar eb'naj Israel,» xhi Komam.

^h 4:13 Nm. 26 ⁱ 5:1 Eb'naj *amorreo*, eb'naj *cananeo*, iskonhob' eb'naj, ha' ek'b'al niman yelapno xol hunteq'an konhob' ay b'ey Canaán yettaxtik'a payat tiempo yet maxhto chi-apni eb'naj Israel b'ey tu'.

³Iswatx'en ya' Josué ch'en ch'en haka' cuchillo, yaq'ni circuncidar ya' eb'naj Israel b'ey istzalanil Aralot. ⁴Yaq'ni circuncidar ya' Josué sunil eb'naj Israel tu', yuto eb'naj el b'ey Egipto, eb'naj k'ulxa isto yinh howal kamilo eb'naj sat tx'otx' desierto yinh b'el. ⁵Yuto sunil eb'naj el b'ey Egipto tu', ayxako circuncisión yinh eb'naj. Wal sunil eb'naj pitzk'a b'ey tx'otx' desierto yet ayko eb'naj yinh isb'el, maxhto ayoko circuncisión yinh eb'naj. ⁶Eb'naj Israel tu' yulb'al 40 (kawinaj) hab'il ek' eb'naj sat tx'otx' desierto, yuxin eb'naj ayko yinh ishab'ilal isto yinh howal el b'ey Egipto kam eb'naj b'ey tx'otx' desierto, yuto mach yijemo yute isb'a eb'naj tet Komam Jahawil. Yuxin yalkano Komam tet eb'naj tato mach chil eb'naj tx'o tx'otx' yaltekano Komam tet eb'ya' jichmam ta chiyaq' jet, ha' ton hune' tx'o tx'otx' kaw k'ul yeb' kaw yax sat.^j ⁷Yuxin yaq' circuncidar ya' Josué isk'ahol eb'naj kamto tu', yaniko Komam isk'ahol eb'naj tu' isseleloj. Eb'naj k'ahole tu', maxhto ayoko yechel circuncisión yinh eb'naj yuto ayko eb'naj yinh isb'el.^k ⁸Yet lahwi yaq'laxkano circuncidar eb'naj winaj Israel tu', iskankano eb'naj xewo yul campamento masanto kawxilo eb'naj. ⁹Lahwi tu' yalni Komam tet ya' Josué: «Hayet ma'okkano yechel circuncisión teyinh ti', ha' chaliloj ta chinmajchekanojan isti' eb'naj Egipto isb'uchwa teyinh,» xhi Komam. Yuxin Gilgal' yijkano isb'i hune' tx'otx' tu'; yexnheto xin isb'ina tinanh. ¹⁰Eb'naj Israel tu', ehayo eb'naj yul iscampamento b'ey tx'otx' Gilgal, haxa yinh q'ejb'iyal yinh 14 (iskanhlahonheb') tz'ayik yinh ixahaw tu', yek'tzen eb'naj q'inh pascua b'ey ak'al satak'ti konhob' Jericó. ¹¹Yinhtik'a hune' tz'ayik tu', haxa sat tz'unub' chi'el sat tx'o tx'otx' tu' isloh eb'naj, iswahni eb'naj ixim pan machi yanhal aykoj, isk'uxnipaxo eb'naj iswi' ixim ak' trigo q'antzeb'il. ¹²Haxa yinh hune'xa sahab' sak'ayal xin, matxa ay maná, yuto haxa sat tz'unub' chi'el sat tx'o tx'otx' b'ey Canaán tu' haxa isloh anma Israel hune' hab'il tu'.

Yil ya' Josué yinh naj ijb'alom yinh yejercito Komam

¹³Yet hunel yet ayko ya' Josué iskawilal konhob' Jericó, hayet ist'anxhito ya', yilni ya' hune' naj haka' soldado, ayko hune' ch'en espada ahnati yul yatut yul isq'ab', ishitziko ya' Josué isk'atanh naj, isq'amb'en ya' Josué tu':

—¿Mak hach anmahil, jetb'imihanh hawehi mato yetb'i eb'naj ayko ishowal jinhanh? xhi ya' Josué.

¹⁴Istaq'wi naj:

—Machoj, haninti'an Ijb'alom yinh yejercito Komam Jahawil, xhi naj. Hayet yab'en ya' Josué haka' tu', yay jahno ya', yay xulno ya' sat tx'otx', yinayo isb'a ya' tet. Isq'amb'en ya' Josué tet naj:

^j 5:6 Ex. 3:8; Nm. 14:8 ^k 5:7 Gn. 17:9-14 ^l 5:9 Gilgal tzotit' yinh ab'xub'al hebreo, ha' chaliloj *ch'el*l.

—¿Mamin, tzet chawoche chawal wetan hanin hachejab' inti'an? xhi ya'.

¹⁵Istaq'wi naj Ijb'alom yinh yejercito Komam Jahawil:

—Ilo haxanhab' yinh hawoj, yuto b'ay linhan hach ti', kaw txahul, yet Komam yehi, xhi naj.

Isyijen ya' Josué tzet yal naj tu'.

Yinh tzet yu yaq'lax ayk'ayo konhob' Jericó

6 ¹Wal ispultahil konhob' Jericó, kaw k'ul yekaniko istel, yu chixiw anma tu' tet eb'naj Israel, machi xin hunu mak chu yoktoj, machi hunu mak chu yelpaxti yul konhob' tu'.

²Yalni Komam Dios tet ya' Josué: «Haninti'an chiwakojan konhob' Jericó yul haq'ab' yeb' isreyal anma tu' yeb' eb'naj soldado ay b'ey tu'.

³Haxa hex soldado Israel hex ti' yulb'al wajejb' tz'ayik chexek' yinh sunil ishoyanil konhob' tu', hunta el chexek' hehoyo' yinh hunun tz'ayik. ⁴Kat isb'ab'i hujwanh eb'naj sacerdote sat Kaxha yet isTrato Komam, kat yiq'ni eb'naj hunun yuk'a' no' winaj me' yu yoq'tzen eb'naj. Haxa yinh ishuj tz'ayik xin, hujel el chexek' hehoyo' konhob' tu', wal eb'naj sacerdote chi'ok eb'naj yoq'tze' yuk'a' no' me' tu'.^m ⁵Haxa yet cheyab'eni ta nanxa chu yoq'tzen eb'naj yuk'a' no' me' tu', kat yichiko yel heyaw yinh kaw ip, kat yay wuyuna isk'ub'al konhob' hoyaniko yinh tu', kat heyokto yul konhob' hunun hex chexto yinh yetk'ulal b'ay ay hex,» xhi Komam.

⁶Lahwi tu', yawten ya' Josué eb'naj sacerdote, yalni ya': «Iweto Kaxha yet isTrato Komam, hujwanh hex xin chexb'ab'i sata Kaxha ti', kat heyi'ni yuk'a' no' winaj me' yu heyoq'tzeni,» xhi ya'. ⁷Yalnipaxo ya' tet konhob' Israel: «Asi'wej kat hehoyi konhob' tu', haxa xin eb'naj soldado chib'ab'i eb'naj sata isKaxha isTrato Komam Jahawil,» xhi ya'.

⁸Isyijen eb'naj sunil tzet yal ya' Josué tu'. Isb'ab'i hujwanh eb'naj sacerdote sata isKaxha Komam Jahawil, yoq'tzen eb'naj no' yuk'a' me' tu', tzujan xin isKaxha isTrato Komam Jahawil yinta eb'naj. ⁹Wal eb'naj soldado yet howal, b'ab'i eb'naj sata eb'naj sacerdote tu', ay xin hune'xa majan eb'naj ok tzujno yinta isKaxha Komam, wal eb'naj sacerdote xin matxa islinhb'a eb'naj yoq'tzen no' yuk'a' me' tu'. ¹⁰Yalni ya' Josué tet eb'naj soldado tato machi hunu eb'naj chi'el yaw nitam istzoteli masanto yet chiyalni ya' Josué tu' ta chi'el yaw eb'naj yinh kaw ip.

¹¹Ischejni ya' Josué tato chishoyik'o isKaxhahil istrato Komam Jahawil konhob' Jericó. Lahwi tu' ismeltzo ya' Josué yeb' eb'naj yul campamento, ha' tu' xin ek'to hune' aq'b'al yib'anh eb'naj. ¹²Haxa yinh hunxa tz'ayik yinh kaw sahab' ah ya' Josué, yinito eb'naj sacerdote isKaxhahil istrato Komam Jahawil. ¹³Haxa xin eb'naj hujwanh sacerdote

^m 6:4 Hune' numero hujeb', yechel yinh tzet kaw tz'ajan yeb' kaw tohol.

iq'nhe no' yuk'a' me', b'ab'i eb'naj sata Kaxha tu', isb'elwi eb'naj, chi-yoq'tzen eb'naj yuk'a' no' me' tu'. Wal eb'naj soldado yet howal, b'ab'i eb'naj sata eb'naj sacerdote tu', nan xin eb'naj soldado kankano tzujno yinta isKaxhahil istrato Komam; machi xin isb'ej eb'naj sacerdote yoq'tzen yuk'a' no' me' tu'. ¹⁴Ha' yinh iskab' tz'ayik ek'paxo eb'naj is-hoyo' konhob' lahan haka' yu eb'naj yinh b'ab'el tz'ayik; lahwi tu' ismeltzo eb'naj yul campamento hunelxa, hak tu' yute eb'naj yulb'al wajeb' tz'ayik.

¹⁵Haxa yinh ishuj tz'ayik, kaw sahab' ahwano eb'naj, isto eb'naj is-hoyo' konhob' Jericó hunelxa, hujel xin ek' eb'naj ishoyo' konhob' yinh hune' tz'ayik tu'. ¹⁶Haxa yet ishujel tu', yet yoq'tzen eb'naj sacerdote yuk'a' no' me', yalni ya' Josué tet anma: «¡Elojab' heyaw yinh kaw ip! Ha' Komam Dios ma'aniko hune' konhob' tu' yul koq'ab'. ¹⁷Ha' sunil konhob' tu' yeb' sunil anma ay yul konhob' wiyom istanhtzelaxkaniloj, yuto hak tu' yalni Komam, hanhe ix Rahab, ix tx'oj ye iswi', mach chitanhtzelaxiloj yeb' sunil mak ayik'o isk'atanh yul yatut, yuto yeb'alo ix eb'naj jet Israelal hul ilno konhob' Jericó yet yalanhtokanoj. ¹⁸Wal hex xin machi hunu tzet ye tu' ay yul konhob' ti' cheyitoj yu yok heyu; maka hetzab'ni, yuto halb'ilxa yu Komam tato wiyom istanhtzelaxiloj; yuto ta mach cheyije, cheyiti tz'akti' yib'anh campamento ti', kat xin yel kotx'ixob'al heyu. ¹⁹Yaja' wal ch'en oro yeb' ch'en plata yeb' sunil tzet watx'eb'il yinh ch'en bronce maka ch'en hierro, chi'ilaxti tet Komam kat yalaxiko yul isk'uwanb'al Komam,» xhi ya' Josué.

²⁰Lahwi tu', yoq'tzen eb'naj sacerdote yuk'a' no' me', hayet yab'en anma Israel hune' tu' yichiko anma yel yaw yinh kaw ip, yay wuyna isk'ub'al konhob' tu', yayk'aykano yul isq'ab' eb'naj Israel, yokto eb'naj yul konhob' yinh anhe yinh yetk'lulal b'ay ay hunun eb'naj. ²¹Ispotx'nikamo eb'naj yu yespada sunil eb'naj winaj yeb' eb'ix ix yeb' eb'naj tzehtaj yeb' eb'ix q'opo yeb' eb'naj ichamta winaj ay yul konhob' tu', ispotx'nipaxokamo eb'naj no' wakax, no' me' yeb' no' burro, istanhtzenilo eb'naj sunil tzet ay yul konhob'.

²²Yalni ya' Josué tu' tet eb'naj kawanh b'eyk'o ilno konhob' Jericó haka' ti': «Asi'we b'ey yatut ix Rahab, ix tx'oj ye iswi', kat heyinilti ix yeb' sunil mak ay yul yatut ix, haka'tik'a yu hetaq'wen tet ix,» xhi ya' Josué. ²³Isto eb'naj yatut ix, yinilti eb'naj ix Rahab tu' yeb' ismam, yeb' ismi' ix, yeb' ej isnoh ix, yeb' sunil mak ayto yuh isb'a ix yeb'i. Yinito eb'naj ix yeb' sunil mak tu' yintalto campamento. ²⁴Isnhusnito eb'naj Israel konhob' tu' yeb' sunil tzet ay b'ey tu'. Hanhe xin ch'en oro yeb' ch'en plata yeb' tzetaj watx'eb'ilayo yinh ch'en bronce yeb' ch'en hierro; sunil ch'en tu' yilti eb'naj, yaniko eb'naj ch'en yul isk'uwanb'al Komam. ²⁵Wal ya' Josué iskolilo ya' ix Rahab yeb' ismam ix, yeb' ismi' ix, yeb' isnoh ix, yeb' makta ayto yu isb'a ix yeb'i, yuto yeb'alo ix eb'naj Israel ischej ya'

Josué b'eyk'o ilno konhob' Jericó. Hataxtik'a tu' xin iskankano ix Rahab yeb' sunil mak ay yu ix xol anma Israel masanto tinanh.ⁿ

²⁶Lahwi tu', yalni ya' Josué hunteq'an tzoti' ti' sata Komam Jahawil: «Ha' mak chi'ok watx'enokanh konhob' Jericó ti', chitz'akti'nhelax yu Komam Dios, chikam isb'ab'el k'ahol yet chiswatx'enokanh xe' konhob' ti'; chikampaxo isk'ahol islahob'al unin yet chi'ok ispultahil konhob',» xhi ya' Josué.

²⁷Kaw kolwa Komam Dios yinh ya' Josué, ispujnakanh isq'umal ya' sunil sat tx'otx' tu'.

Ismul naj Acán

7 ¹Ay xin hune' naj xol eb'naj Israel titna yinh ya' Judá, chiyij Acán, isk'ahol naj Carmi ye naj, ismam icham naj ye naj Zabdi, ha' xin naj Zera ismam icham ismam naj. Naj Acán tu' ay hunteq'an tzet yito naj halb'ilkanoj ta maq'b'il istanhtzelaxkaniloj. Yu hune' tu', yuxin sunil anma Israel yako ismul yul sat Komam Dios, istit ishowal Komam yinh konhob' Israel.

²Hayet ay ya' Josué yeb' eb'naj Israel b'ey Jericó, ischejnito ya' haywanh eb'naj Israel b'ey konhob' Hai, yunhe isto eb'naj yilno konhob' tu'. Konhob' Hai, ayko satak'ti Bet-el, iskawilal Bet-avén. Yalni ya' Josué tet eb'naj: «Asi'weto b'ey konhob' Hai, kat heyilni konhob' tu',» xhi ya'. Isto eb'naj yilno konhob' Hai. ³Hayet ismeltzo eb'naj xin, yalni eb'naj tet ya' Josué: «Mach yilalo chi'ahto sunil eb'naj Israel yaq'a'ko howal yinh konhob' Hai, wal xin kab' oxeb'nhe mil eb'naj chi'aniko howal yinh konhob' tu'. Mach chi'ahto sunil eb'naj yeta' isk'ul, yuto haywanhnhech'an mak chitanhen konhob' tu',» xhi eb'naj.

⁴Hak tu' xin oxeb'nhe mil eb'naj ahto yaq'a'ko howal yinh konhob' tu', yaja' xin q'oji eb'naj ay yul hune' konhob' tu' yinh eb'naj Israel, is-tzumb'en eb'naj eb'naj. ⁵Tzumb'elax eb'naj Israel yu eb'naj b'ey ispultahil konhob' tu', masanta b'ey konhob' Sebarim, ismaq'nikamo eb'naj 36 (waj-lahonheb' iskawinaj) eb'naj soldado Israel yinh istzalanil witz yalanh konhob' tu'. Yuxin kab'konkanh isk'ul anma Israel, ispax yip, ischewb'i-lo eb'naj haka' ha ha'. ⁶Wal ya' Josué istzililo ya' xil isq'ap, yanahto ya' pojox xol xil iswi' yu b'isk'ulal. Hak tu' yutepaxo eb'naj ichamta winaj Israel. Yay jahno eb'naj sata isKaxhahil istrato Komam, yay xulno eb'naj sat tx'otx', masanto yinh q'ejb'iyal.^o ⁷Yalni ya' Josué tet Komam:

—¡Ay Mamin, Jahawilanh! ¿Tzet yinh yuxin konhhawik'tijanh is-q'axeb'ik'ti ha' Jordán ti'? ¿Tom yu konhhawanikojanh yul isq'ab' anma

ⁿ 6:25 Ix Rahab chi'aq'lax b'inaho ix xol eb'naj yichmam Komam Jesucristo. Mt. 1:5.

^o 7:6 Istzilto naj xil isq'ap, yanahto naj tanh yinh iswi', hak tu' chu isyenilo isb'isk'ulal yeb' isya'tajil chab'e. Gn. 37:29-34; Job 1:20; 2:12.

amorreo ti', kat konhistanhtzenilojanh eb'naj? ¡Majaltam konhkantik'a-kanojanh isq'axeb'ik'to ha' Jordán sataj! 8 ¡Ay Mamin! ¿Tzet chiwute walnihan tinanh? Yuto matzumb'elax eb'naj Israel, ma'elkanh eb'naj tet eb'naj ayko ishowal yinh. 9 Eb'naj cananeo yeb' sunil anma ayayo yul ismajul tx'o tx'otx' ti', chiyab'elo eb'naj hune' ti', kat yawten isb'a eb'naj jinhanh, kat isb'utnikanh eb'naj kob'ihanh. Ta hak tu', ¿tzet chu isb'ina hab'i? xhi ya' Josué.

10 Istaq'wi Komam tet ya' Josué:

—Ikanh hab'a, ¿tzet yinh xin makaxhay jahnoj, maxawanayo hapalanh xol tx'otx'? 11 Ha' anma Israel ti' mayako ismul, masmanhk'on intzoti'an waq'an tet, yito eb'naj tzet walan ta chitanhtzelaxkaniloj, yelq'anti eb'naj yinh ewantajil, yeb'anto eb'naj hunteq'an tu' b'ay aya. 12 Yuxin ha' eb'naj Israel ti', mach chiq'oji eb'naj yinh anma ayko ishowal yinh, wal xin chi'elkanh eb'naj tet eb'naj. Yu ismul eb'naj tu', yuxin yet ay hetanhtzelaxiloj. Tato mach cheyuchk'ato tzet halb'ilkano wuhan ta chi'uchk'alaxtoj, hak tu' xin mach chu wokan heyetb'ihoj. 13 Wal tinanh xin, ikanh hab'a, kat hasajnhen konhob' ti', kat hawalni tet ta chiswatx'e isb'a, yuto yet hekal chi'ok insatajan. Hanin heYahawilinti'an, yeb' heDiosal, chiwalan hune' ti': “Hex Israel hex ti', xaheyiti tzet halb'il wuhan ta chitanhtzelaxilo yinh hunelnhe. Tato mach cheyilo texol, chextanhiloj, mach chu heq'oji yinh eb'naj ayko ishowal teyinh,” xhi Komam. 14 Yet hekal chexok insatajan yinh hunun majan hex Israel hex ti'; ha' xin hune' majan eb'naj Israel chinyehan xol tu', chi'ok hune' majan eb'naj yuxhtanhe isb'a tu' insatajan, haxa xol eb'naj yuxhtanhe isb'a tu', chi'ok hunun nahil anma tu' insatajan, haxa yinh hunun nahil anma tu', chi'ok hunun eb'naj winaj insatajan yinh hununtajil. 15 Ha' xin mak chi'ilchahi ta yiti tzet walan ta chitanhtzelaxiloj, ha' hune' mak tu' chinhuslaxkantoj yeb' yixal, yuninal yeb' sunil tzet aya, yuto iswatx'e istx'ojal xol eb'naj Israel, ismanhk'on ist'inhanil chejb'anile aq'b'il wuhan, xhi Komam.

16 Haxa yet hunxa tz'ayik, yinh sahab' sak'ayal ah ya' Josué, yalni ya' ta chihitziko konhob' Israel yinh hunun majan, yinhnhena tu' isyeni Komam Dios eb'naj Israel titna yinh ya' Judá. 17 Yalni ya' Josué ta chi'ok hune' majan eb'naj yuxhtanhe isb'a titna yinh ya' Judá tu' sata Komam, isyeni Komam eb'naj titna yinh naj Zera. Haxa xol eb'naj titna yinh naj Zera tu' isyeni Komam naj Zabdi. 18 Haxa yet yok eb'naj isk'ahol naj Zabdi sata Komam, isyenilo Komam naj Acán, isk'ahol naj Carmi, ismam icham naj Acán tu' ye naj Zabdi, ha' xin ismam naj Zabdi ha' naj Zera. Haxa naj Zera tu' xin, titna yinh ya' Judá.

19 Lahwi tu', yalni ya' Josué tet naj Acán:

—Hach wet konhob', ayojab' yelapno Komam Dios yul hasat, kat hanwaniko ismay Komam, koDiosal hanhonh Israelonh ti'; chawalnilo wetan tzet istx'ojal maxawatx'e, matzet xin chaweb'a, xhi ya' Josué.

²⁰Istaq'wi naj Acán:

—Yinh kaw yeli, wako inmulan tet Komam Jahawil, koDiosal, ha' hunteq'an ti' witijan; ²¹xol hunteq'an tzet ye tu' ay b'ey Jericó, wilan hune' q'ap q'ap kaw k'ul titna b'ey Babilonia, yeb' 200 siclo ch'en plata, yeb' hunlijan ch'en oro, 50 (lahonh yoxk'al) siclo^p yalil. Wochenikojan hunteq'an tu', winitijan wetojan, mujb'il xin wuhan yul q'ap inmantiadohan, ha' kaw yich xin ayayto ch'en melyu wuhan, xhi naj.

²²Ischejnito ya' Josué haywanh eb'naj yatut naj Acán tu', isto eb'naj yinh anhe, yilcha hunteq'an tu' yu eb'naj, ayayto ch'en melyu yalanh yu naj. ²³Yinito eb'naj hunteq'an tu' tet ya' Josué yeb' tet sunil eb'naj Israel, yaniko eb'naj sata Komam Dios. ²⁴Lahwi tu', yinito eb'naj naj Acán b'ey ak'al Acor, yilaxpaxto ch'en melyu plata yeb' q'ap q'ap, yeb' hunlijan ch'en oro tu'; yilaxpaxto eb'naj isk'ahol naj yeb' eb'ix iskutz'in naj, yeb' ej iswakax naj, yeb' ej isburro naj, yeb' ej isme' naj, yeb' q'ap q'ap aykanh yatuto naj yeb' sunil tzet ay naj.

²⁵Yalni ya' Josué tet naj Acán:

—¿Tzet yinh yuxin maxawiti hune' isya'tajil ti' jib'anh? Wal xin yaq'ab'kanayo Komam isya'tajil tawib'anh, xhi ya' Josué.

Hayet yalni ya' haka' tu', isq'ojnikamo sunil eb'naj Israel naj Acán yeb' yuninal naj, isnhuslaxkanto naj. ²⁶Lahwi tu', istenb'ankanh eb'naj ch'en ch'en yib'anh naj Acán; tenantokanh ch'en tinanh. Yu hune' tu' yuxin Acor ok isb'iho hune' tx'o tx'otx' tu'; yexnheto xin yal-lax yinh tx'otx' tu' tinanh. Hak tu' yu istanh ishowal Komam yinh anma Israel.

Q'oji eb'naj Israel yinh konhob' Hai

8 ¹Lahwi tu' yalni Komam Dios tet ya' Josué: «Mach chaxhxiwi, mach chikab'kon hak'ul. Ito sunil eb'naj soldado kat ható yeb' eb'naj heyanko howal yinh konhob' Hai, kat wanikojan konhob' tu' yeb' isreyal yul heq'ab', kat yokkano istx'otx' eb'naj tu' heyu. ²Haka'tik'a heyu yinh konhob' Jericó yeb' isreyal, haktik'apax tu' cheyute yinh konhob' Hai yeb' isreyal, yaja' wal tzet ay anma tu' chisje yokkano heyu yeb' ej isnoq' anma yet chexq'oji yinh konhob' tu'. Cheyeb'a heb'a yintalto konhob', hayet tona nahul ay eb'naj xin, kat heyanko howal yinh,» xhi Komam.

³Iswatx'en isb'a ya' Josué yeb' issoldado yu isto yanoko howal yinh konhob' Hai. Issaynilo ya' 30 mil eb'naj soldado kaw helan, kaw ay yip; ischejnito ya' eb'naj yinh aq'b'alil, ⁴yalni ya' Josué chejb'anile tet eb'naj haka' ti': «Kaw kam cheyab'ewe xin, ha' yintalto konhob' tu' chexehi, kat heyeb'anto heb'a b'ey tu', mach xin nahato chexel yinh konhob', kaw xin helan cheyute heb'a heychman heyanko howal tu'. ⁵Wal hunteq'an-xa eb'naj soldado Israel xin, chintohan yeb' eb'naj, kat kohitzikojanh

P 7:21 Hune' siclo, lahan yalil yeb' 11 gramos, ek'b'al hune' libra.

iskawilal konhob' tu', haxa yet chi'elti eb'naj yaq'a'ko howal jinhanh, kat jelkanhanh tet eb'naj, haka' heyu yet b'ab'elal. ⁶Kat yok tzujno eb'naj jintajanh yet chonhelkanh tu'an. Chisnanipaxo eb'naj: "Eb'naj Israel ti' chi'elkanh eb'naj jet haka' yet b'ab'elal," xhiho eb'naj. Tonh yinta eb'naj, lanhan koq'o'ji yinh eb'naj. ⁷Wal hex ti' xin chexelti b'ay eb'ab'il heb'a, kat heyokto lemna yul konhob' tu', yuto ha' Komam Dios Jahawil, ko-Diosal chi'aniko konhob' tu' yul heq'ab'. ⁸Haxa yet xa'ayk'ay konhob' yul heq'ab' tu', kat heyaniko q'a' yinh. Haka'tik'a yu yalnikano Komam Jahawil chejb'anile, hak tu' chiwute walnikanojan teyet,» xhi ya' Josué.

⁹Yalni ya' Josué ta chito eb'naj; lahwi tu' xin isto eb'naj yeb'ano isb'a xolb'al Bet-el yeb' konhob' Hai, yintalto konhob', yetk'ulal b'ay chi'ahilo tz'ayik. Wal ya' Josué tu' xin kantokano ya' hune'xa aq'b'al yul campamento.

¹⁰Haxa yet hunxa tz'ayik xin, kaw sahab' ah ya' Josué, iskutxb'aniko ya' hunteq'anxa eb'naj soldado, lahwi tu' isb'ab'i ya' yeb' eb'naj ichamta Israel sata eb'naj soldado tu', isto eb'naj yanoko howal yinh konhob' Hai. ¹¹Ishitzato eb'naj aq'om howal yinh konhob' yinh yetk'ulal isti' ispultahil, iswatx'enkanh eb'naj iscampamento sat ak'al yinh yetk'ulal norte yinh konhob' Hai tu', hak tu' xin yu iskankano ak'al tu' xolb'al eb'naj yeb' konhob'. ¹²Ya' Josué tu', ischejto ya' howeb' mil eb'naj yeb'a' isb'a xolb'al Bet-el yeb' konhob' Hai, yinh yetk'ulal b'ay chito tz'ayik. ¹³Hak tu' xin kab' majan eliko eb'naj soldado Israel tu'; hune' majan eb'naj eb'ab'il isb'a yinta konhob', yinh yetk'ulal b'ay chito tz'ayik, hunxa majan eb'naj xin ayayo yul campamento yinh yetk'ulal norte. Haxa ya' Josué xin hitzto ya' yiktab'al ak'al tu' yet aq'b'alil.

¹⁴Haxa yet yilniti naj isreyal konhob' Hai hune' tu', kaw sahab' ah-wano naj, yah lemna naj yeb' sunil issoldado yelto naj yanoko howal yinh eb'naj Israel b'ey yak'alil isti' ha' Jordán. Mach xin yohtajo eb'naj tato ay hunteq'anxa eb'naj soldado Israel eb'ab'il isb'a yintalto konhob' tu'. ¹⁵Ya' Josué yeb' issoldado tu' k'ul yub' eb'naj yaq'len yelkanh eb'naj tet eb'naj ay yul konhob' Hai, isto eb'naj yul b'eh chi'apni b'ey tx'otx' desierto. ¹⁶Hak tu' xin yu yaq'lax chejb'anile tet eb'naj soldado ay yul konhob' Hai ta chistzumb'e eb'naj ya' Josué yeb' issoldado, kaw xin nahat el eb'naj yinh iskonhob' tu'. ¹⁷Sunil eb'naj winaj ay yul konhob' Hai yeb' konhob' Bet-el, ok tzujno yinta eb'naj Israel tu', matxa hunu eb'naj kan yul iskonhob'. Yu kaw yako eb'naj yinh isk'ul isto istzumb'eno eb'naj Israel, yuxin ishajb'akano eb'naj ispultahil iskonhob' tu'. ¹⁸Lahwi tu' yalni Komam Dios tet ya' Josué: «Yeto halanza iq'b'il yul haq'ab' yinh yetk'ulal konhob' Hai, yuto chiwakojan konhob' ti' yul haq'ab',» xhi Komam.

Hak tu' yu isyenito ya' Josué islanza ayko yul isq'ab' yinh yetk'ulal konhob' Hai. ¹⁹Yelti eb'naj soldado yinh anhe b'ay eb'ab'il isb'a, yokto eb'naj yul konhob' Hai yinh anhe, yaniko eb'naj howal yinh, isnhusnito eb'naj konhob' tu'.

²⁰Wal eb'naj ah konhob' Hai, ismeltzo isb'a eb'naj, ist'anhxito yinh iskonhob', yilni eb'naj tato toxanhe topton yah isnhub'al iskonhob' tu' satkanh; matxa xin b'ay chu iskolni isb'a eb'naj. Yuto eb'naj Israel is-tzumb'e eb'naj sat tx'otx' desierto, meltzoti eb'naj yaq'a'ko howal yinh eb'naj ah Hai. ²¹Haxa yet yilnito ya' Josué yeb' eb'naj Israel tato xa'ayk'ay konhob' tu' yul isq'ab' eb'naj eb'ab'il isb'a, yilni eb'naj yah isnhub'al konhob' tu', ismeltzo eb'naj yanoko howal yinh eb'naj soldado yet konhob' Hai. ²²Haxa eb'naj soldado Israel ayikto yul konhob' tu', elti eb'naj, istit eb'naj yinh eb'naj soldado Hai, hak tu' yu iskankano eb'naj xol iskab' majan eb'naj Israel tu'. Yaniko eb'naj Israel howal yinh eb'naj, ispotx'nikamo eb'naj sunil eb'naj, matxa xin hunu eb'naj kolchaloj. ²³Wal naj isreyal konhob' tu', mach ispotx' eb'naj naj, wal xin istzab'ayo eb'naj naj, yinito eb'naj naj yinh itzitzal sata ya' Josué.

²⁴Lahwi ispotx'ni eb'naj Israel sunil eb'naj soldado Hai elti tzumb'eno sat ak'al tu', ismeltzo eb'naj Israel yul konhob' Hai, ispotx'ni eb'naj makta kantokano yul konhob' tu'. ²⁵Ha' xin isb'isil eb'naj winaj yeb' eb'ix ix kam yul konhob' Hai, 12 (kab'lahonheb') mil isb'isil yinh sunil. ²⁶Wal ya' Josué tu' machi yiyo ya' isq'ab', hune'nhetik'a isyenito ya' islanza yetk'ul-al konhob' Hai masanto tanhilo sunil anma ay b'ey konhob' Hai. ²⁷Wal isnoq' anma yeb' tzetaj ay anma yul konhob' tu', okkano yu eb'naj Israel, haka'tik'a yu yalni Komam Dios tet ya' Josué. ²⁸Isnhusnikanto ya' Josué konhob' Hai yinh hunelnhe, haxanhe xin yek'lenajil konhob' tu' ixtanhto tinanh. ²⁹Wal naj Isreyal konhob' tu', ist'unhb'akanh ya' Josué naj yinh isq'ab' hune' te' q'eb'taj masanto yinh q'ejb'iyal. Haxa yet isq'ejb'ayo tu', ischejni ya' Josué ilaxoyti isnimanil naj, isto alaxayo naj isti' ispulta-hil konhob' Hai, istenb'ankanh eb'naj ch'en ch'en yib'anh isnimanil naj; tenantokanokanh ch'en ch'en tu' tinanh.

II-lax istzoti'al chejb'anile b'ey yich witz Ebal

³⁰Lahwi tu' iswatx'enkanh ya' Josué hune' mexha yet xahanb'alil yinh ch'en ch'en tet Komam Jahawil, isDiosal eb'naj Israel, ha' hune' tu' iswatx'e ya' Josué b'ey witz Ebal. ³¹Iswatx'enkanh eb'naj ch'en ch'en haka'tik'a yu yalnikano ya' Moisés, ischejab' Komam Dios tet eb'naj Israel, yeb' haka' yalni hum yet chejb'anile b'ay chal haka' ti': «Ha' ch'en ch'en mach paq'b'ilo isk'ul, ha' ch'en ch'ok mexhahil yeto xahanb'al,» xhi-hayoj. Lahwi tu' isnhusni eb'naj Israel isxahanb'al yib'anh ismexhahil yet xahanb'al tet Komam, yaq'nipaxo eb'naj isxahanb'al, yeb'alq'ab'e yet aq'ank'ulal.^q ³²Istz'ib'nheniko ya' Josué chejb'anile aykano yu ya' Moisés tet eb'naj Israel, yinh ch'en ch'en ayko ismexhahil yet xahanb'al yinh sat sunil konhob' Israel. ³³Lahwi tu', sunil eb'naj Israel yeb'

^q 8:31 Ex. 20:24-26; Dt. 27:5-6

anma mach Israelo ayko xol eb'naj, yeb' eb'naj ichamta winaj Israel yeb' eb'naj yahawil soldado, yeb' eb'naj juez, ok linhno eb'naj iskawilal eb'naj sacerdote levita, eb'naj iq'nhe Kaxha yet istrato Komam Jahawil. Yikta eb'naj tu' ok yich witz Gerizim, haxa yiktaxa eb'naj xin okpaxo yich witz Ebal; isq'anni eb'naj sacerdote isk'ulal Komam Dios yib'anh konhob' Israel, haka'tik'a yu yalnikano ya' Moisés, ischejab' Komam, yet yalanhtokanoj.

³⁴Lahwi tu', yilni ya' Josué hunun chejb'anile tz'ib'nheb'ilkano yul hum yab'e' sunil anma; hunteq'an isk'ulal isk'ul Komam Dios yeb' is-ya'tajil chiyayo Komam yib'anh eb'naj machi yijen tzet chal Komam. ³⁵Machi hunu chejb'anile halb'ilkano yu ya' Moisés, machi yalilo ya' Josué, wal xin tz'ajan yalilo ya'; kaw xin sunil konhob' Israel ab'enkanoj; yab'e eb'naj winaj, yab'e eb'ix ix, yab'e nixhte unin, yeb' anma mach Israelo ayko xol eb'naj Israel tu'.

Leq'ti'al yako eb'naj Gabaonita tet eb'naj Israel

9 ¹Yab'elaxilo isq'umal tzet iswatx'e ya' Josué yu eb'naj isreyal eb'naj heteo, eb'naj amorreo, eb'naj cananeo, eb'naj ferezeo, eb'naj heveo yeb' eb'naj jebuseo. Eb'naj ayayo satak'to isti' ha' Jordán, b'ey chewal tx'otx', yeb' satla ak'al, yeb' isti'la ha' mar Mediterráneo masanta chi'apni b'ey tx'otx' Lífano, yab'elo eb'naj tu' tzet iswatx'e ya' Josué. ²Islahti'nhen isb'a eb'naj isreyal hunteq'an konhob' tu', iskutxb'aniko isb'a eb'naj yu yaniko howal yinh ya' Josué yeb' yinh eb'naj Israel. ³Yaja' wal anma heveo ay b'ey Gabaón, hayet yab'enilo isq'umal tzet utelax konhob' Jericó yeb' konhob' Hai yu ya' Josué, ⁴istxumni eb'naj yinh tzet chu yaniko eb'naj leq'ti'al tet ya' Josué. Yiti eb'naj hunteq'an sacco kaw xilxa yeb' b'ujtaxanhe, yeb' no' tz'um kaw xilxa, yeb' holkixhtaxanhe b'ay chi'ayto vino, yanahto eb'naj sunil hunteq'an tu' yib'anh isburro, isto eb'naj yilno ya' Josué. ⁵Yanipaxiko eb'naj xilq'ape kaw xilxa yeb' kaw b'ujb'iltaxanhe, yanipaxiko eb'naj no' xanhab' kaw xilxa yinh yoj. Ha' xin ixim pan kaw kaw yeb' ayxa xil, ha' yito eb'naj yinh isb'el tu'. ⁶Hayet yapni eb'naj b'ey iscampamento eb'naj Israel b'ey Gilgal, yalni eb'naj tet ya' Josué yeb' tet eb'naj Israel haka' ti':

—Hanhonhti'anh, kaw nahat kopetohanh, makonhhulanh, yuto chijochehan chikowatx'ehan hunu kotratohanh yeb' hex, xhi eb'naj.

⁷Istaq'wi eb'naj Israel tet eb'naj heveo tu':

—K'uxantaxka kokawilal ti'anh ay hex, ¿tzet chu kowatx'en kotratohanh yeb' hex? xhi eb'naj.

⁸Yaja' xin yal eb'naj tet ya' Josué:

—Hanhonhti'anh, hinanonhanh jokanh hachejab'oj, xhi eb'naj.

Istaq'wi ya' Josué tet eb'naj:

—¿Mak hex anmahil? ¿B'aytu'wal hepeto? xhi ya'.

⁹Istaq'wi eb'naj tet ya' Josué:

—Hanhonhti'anh, kaw nahat kopetohanh, xajab'ehanh tato kaw aykano ismay Komam heYahawil, heDiosal, jab'enpaxojanh tzet iswatz'e Komam b'ey Egipto; ¹⁰yeb' tzet yute Komam eb'naj kawanh rey, isrey-al anma amorreo ay isq'axeb'ik'to ha' Jordán, ha' ton naj Sehón, rey ay b'ey Hesbón, yeb' naj rey Og, ay b'ey Basán, ayko yul ismajul tx'otx' As-tarot. ¹¹Yu hune' tu', yuxin yal eb'naj jahawilanh yeb' jet konhob'anh jetanh haka' ti': “Iq'we tzet cheloh yeb' tzet chi'okniko heyu yinh heb'el, kat heto heyilno eb'naj Israel b'ay ay eb'naj, kat heyalni tet eb'naj tato chonhok ischejab'o eb'naj kat kowatz'enkano kotrato yeb' eb'naj,” xhi eb'naj jetanh. ¹²Hayet jelahnh b'ay ayonhanh yu kotitanh kexjilnojanh, ha' tzet chikolohanh jitijanh yinh kob'el ti'anh, kaw kajto jinitijanh, yaja' wal tinanh kaw kawxa, yeb' ayxa xil ixim. ¹³Hakpax tu' no' tz'um ti', kaw ak'to no' yet konotzenanh no' yu vino, yaja' wal tinanh xin, holanxa no'. Hakpax tu' xil koq'apanh yeb' koxanhab'anh, kaw ak'to yet jelahnh, wal tinanh kaw xilxa, yuto kaw nahat kopetohanh, xhi eb'naj.

¹⁴Yab'len eb'naj Israel tzet chislo eb'naj tu', yaja' mach isq'amb'e eb'naj tet Komam Dios yinh tzet chiyute isb'a eb'naj yeb' eb'naj. ¹⁵Lahwi tu', ist'inhb'ankano ya' Josué istzoti' yinh aq'ank'ulal yeb' eb'naj, yalni ya' Josué tato chi'aq'lax nimank'ulal yinh eb'naj, hak tu' xin mach chitanhtzelaxilo eb'naj. Haktik'apax tu' yute yalni eb'naj yahawil yinh eb'naj Israel, yaq'ni b'inaho eb'naj isb'i Komam yinh.

¹⁶Haxa yinhxa oxeb' tz'ayik ist'inhb'ankano eb'naj istrato xin yab'en-ilo eb'naj Israel tato ha' iskawilal eb'naj ayayo eb'naj gabaonita tu', eb'naj b'ay yaq' istrato b'ay ist'inhb'a eb'naj istzoti' yeb' eb'naj. ¹⁷Lahwi tu', isto eb'naj Israel issayno b'ay ay eb'naj gabaonita, haxa yinh yox tz'ayik, yapni eb'naj b'ay ay iskonhob' eb'naj, ha' ton konhob' Gabaón, konhob' Cafira, konhob' Beerot, yeb' konhob' Quiriat-jearim. ¹⁸Yaja' xin, mach potx'laxkamo anma ay yul hunteq'an konhob' tu' yu eb'naj Israel, yuto eb'naj yahawil eb'naj Israel tu' yaq' b'inaho eb'naj isb'i Komam Dios yet yalni eb'naj ta chi'aq'lax nimank'ulal yinh eb'naj gabaonita tu'.

Yuxin ok anma Israel b'uchwal yinh eb'naj yahawil konhob'. ¹⁹Yuxin yal eb'naj yahawil konhob' tu' haka' ti':

—Hanhonhti'anh, jaq' b'inahojanh isb'i Komam Jahawil, koDiosal, jalnihanh tato mach chikopotx'kamo eb'naj, yuxin matzet chijute eb'naj. ²⁰Mach chikotantzeltelo eb'naj, yuto ta chikomanhk'o yinh tzet taq'web'il ju, yet jaq'ni b'inaho isb'i Komam Dios, chitit ishowal Komam jinh, xhi eb'naj.

²¹Yalnipaxo eb'naj yahawil eb'naj Israel tu' tato mach chipotx'laxkamo eb'naj gabaonita tu', yaja' xin alaxkaniko eb'naj ijo si', yeb' ijo ha' xol eb'naj Israel; hak tu' yu isyijen eb'naj yahawil yinh tzet yala.

²²Wal ya' Josué, yawte ya' eb'naj gabaonita tu', yalni ya' tet eb'naj:

—¿Tzet yinh yuxin heyako leq'ti'al jetanh, heyalni tato kaw nahat hepeto, ta'an kokawilalanh ayexayo b'ani? ²³Yu hune' tu', yuxin chi'ay tz'akti' teyib'anh, chejab' cheyukaniko yinh sunib'al ej tiempo, hex xin chexokkano tzok'o si' yeb' ijo ha' chi'okniko yul Yatut Komam Dios, ko-Diosalanh, xhi ya' Josué.

²⁴Istaq'wi eb'naj tet ya' Josué:

—Ay tzet yinh hak tu' jutehanh, yuto konhxiwanh tato chonhhepotx' kamojanh, yuto jab'elojanh tato Komam Dios, heDiosal halnikaniko tet ya' Moisés ischejab', tato chiyaq'kano Komam hunteq'an tx'o tx'otx' ti' teyet, kat hetanhtzenkanilo sunil anma ayayo sat tx'otx'. ²⁵Yuxin tinanh ayonhxakojanh yul haq'ab', ha' b'aytet istoholal chawab'e, watz'e jinhanh, xhi eb'naj.

²⁶Hak tu' xin yute ya' Josué, matxa isje ya' ta chipotx'laxkamo eb'naj gabaonita yu eb'naj Israel. ²⁷Yaja' yakaniko ya' Josué eb'naj gabaonita ijo si', yeb' ijo ha' xol eb'naj Israel, yeb' ha ha' yeb' te' si' chi'okniko yinh ismexhahil yet xahanb'al tet Komam Dios, Jahawil, b'ay chissayilo Komam b'ay chi'ah isTabernáculo. Ha' to xin ismunil eb'naj gabaonita tu'.

Yet isq'oji eb'naj Israel yinh eb'naj amorreo

10 ¹Hayet yab'enilo naj Adonisedec, isreyal konhob' Jerusalén tato ayk'ay konhob' Hai yul isq'ab' ya' Josué, istanhtzenkanilo ya' konhob' tu', kaw xiwkanh naj, yuto lahan utelax konhob' tu' yeb' isreyal, haka' utelax konhob' Jericó yeb' isreyal yu ya' Josué. Kaw xiwpaxokanh naj yet yab'enpaxilo naj tato yako isb'a eb'naj gabaonita yul isq'ab' ya' Josué yeb' yul isq'ab' anma Israel yu iskolni isb'a eb'naj. ²Kaw xiwkanh naj yuto ha' konhob' Gabaón tu' kaw ay yelapnoj haka' hunteq'an konhob' ay isreyal, kaw ek'b'al nimajal yekoj sata konhob' Hai, yeb' xin kaw ay yip yinh howal. ³Yu hune' tu', yuxin yalto naj Adonisedec, isreyal konhob' Jerusalén tzoti' tet naj Hoham, isreyal konhob' Hebrón, yeb' tet naj Piream, isreyal konhob' Jarmut, yeb' tet naj Jafia, isreyal konhob' Laquis, yeb' tet naj Debir, isreyal konhob' Eglón, yalnito naj haka' ti': ⁴«Titanhwej, kat hekolwa winhan, kat janiko howal yinh eb'naj gabaonita, yuto xa'ok eb'naj yinh aq'ank'ulal yeb' ya' Josué yeb' eb'naj Israel,» xhito naj. ⁵Hak tu' yu iskutxb'anayo isb'a eb'naj howanh rey amorreo tu'; ha' ton naj isreyal konhob' Jerusalén yeb' naj isreyal konhob' Hebrón, yeb' naj isreyal konhob' Jarmut, yeb' naj isreyal konhob' Laquis, yeb' naj isreyal konhob' Eglón, yahto eb'naj yeb' issoldado, yanikanh eb'naj iscampamento satak'ti konhob' Gabaón yu yaniko eb'naj howal yinh.

⁶Ischejnito eb'naj Gabaón hal-laxo tet ya' Josué yul campamento b'ey Gilgal haka' ti': «Ahanhti yinh anhe kolwahanh jinhanh yuto sunil eb'naj isreyal anma amorreo ay chewal tx'otx' ti', maskutxb'ayo isb'a yu yaniko howal jinhanh. Mach chamanhk'o hakolwa jinhanh, hanhonh

konhhachejab'onh ti'anh,» xhito eb'naj tet ya' Josué. ⁷Hayet yab'en ya' Josué hune' tu', yel ya' b'ey Gilgal yeb' issoldado, eb'naj kaw ay yip, kaw helan. ⁸Yalni Komam Dios tet ya' Josué: «Mach chaxhxiw tet eb'naj, yuto haninan chiwakojan eb'naj yul haq'ab', machi hunu eb'naj tu' chiq'oji tawinh,» xhi Komam.

⁹El ya' Josué yeb' issoldado b'ey konhob' Gilgal, aq'b'alil ahapno eb'naj, tona nahul ay eb'naj yet yapni eb'naj Israel tu'. ¹⁰Yaniko Komam Jahawil hune' niman xiwkilal yinh eb'naj yet yilni eb'naj eb'naj Israel; kaw xin niman eb'naj tanhtzelaxkanilo b'ey konhob' Gabaón. Istzumb'en eb'naj hunteq'anxa eb'naj yul b'eh chi'apni b'ey Bet-horón, ismaq'nikamo eb'naj eb'naj amorreo tzab'cha yu, masanta b'ey konhob' Azeca yeb' b'ey konhob' Maceda. ¹¹Hayet yayapno eb'naj amorreo yinh isxulanil Bet-horón, yet lanhan yelkanh eb'naj tet eb'naj Israel, yaniti Komam Dios ch'en nimeta sajb'at yib'anh eb'naj masanta apni b'ey konhob' Azeca; is-tanhkanilo eb'naj yu ch'en nimeta sajb'at tu'. Ha' isb'isil eb'naj kam yu ch'en sajb'at tu' ek'b'al sata isb'isil eb'naj kam yu ch'en espada yu eb'naj Israel.

¹²Hayet yaniko Komam Jahawil eb'naj amorreo yul isq'ab' eb'naj Israel, istzotel ya' Josué tet Komam Dios Jahawil sata konhob' Israel, yalni ya' haka' ti':

«Mamin, islinhb'ahab' isb'a tz'ayik yib'anh Gabaón,
kat yokpaxo linhno ixahaw yib'anh yak'alil Ajalón,» xhi ya'.

¹³Hak tu' yu yok linhno tz'ayik yeb' ixahaw,
masanto q'oji eb'naj Israel yinh makta ayko ishawal yinh.

Hak tu' yu istz'ib'nhelaxkano yul yum naj Jaser. Yet hunel, ok linhno tz'ayik yiktab'al satkanh. Hune' tz'ayik xin elto yib'anh, mach b'elwi.^r

¹⁴Machi hunuxa tz'ayik haka' hune' tz'ayik tu'; nitam yet yalanhtokanoj, nitam yet tzujanilxa, yuto yab'e Komam Jahawil tzet isq'an hune' naj winaj, yuto ha' Komam yaq' howal selelo eb'naj Israel.

¹⁵Lahwi tu', ismeltzo ya' Josué yeb' eb'naj Israel b'ey Gilgal yul is-campamento. ¹⁶Yaja' wal eb'naj howanh rey, isreyal hunteq'an konhob' tu' elkanh eb'naj, yeb'anto isb'a eb'naj yul hune' ch'en nhach'en b'ey konhob' Maceda. ¹⁷Apni yalomal tet ya' Josué tato howanh eb'naj rey eb'ab'il isb'a yul hune' ch'en nhach'en b'ey konhob' Maceda. ¹⁸Yalni ya' Josué haka' ti': «B'alweyti ch'en nime ch'en isti' ch'en nhach'en tu', kat hemajchenkano isti' ch'en yu ch'en, kat heyeniko istanhemal ch'en. ¹⁹Yaja' wal hex mach chekankano b'ey ti', wal xin asi'we yinta hunteq'anxa eb'naj lanhan yelkanh, eb'naj ayiko ishawal jinh, kat heyeniko howal yinh eb'naj. Machi xin chechah meltzoho eb'naj yul iskonhob', yuto ha' Komam Dios Jahawil koDiosal, xa'aniko eb'naj yul koq'ab',» xhi ya' Josué.

^r 10:13 2Sam. 1:18; Jue. 5:1-31; Nm. 21:14

²⁰Hanik'xanche mach tanhilo eb'naj ayko ishowal yinh eb'naj Israel yu ya' Josué yeb' yu eb'naj soldado Israel; kaw nimankano eb'naj kami, yaja' xin ayto haywanhxa eb'naj kani, isto eb'naj iskolno isb'a yul iskonhob' b'ay ayko isk'ub'al. ²¹Wal eb'naj soldado Israel xin meltzo eb'naj yul campamento b'ey Maceda b'ay ay ya' Josué; machi hunu eb'naj ti' lahwi, machi hunu eb'naj kampaxoj. Machi hunu eb'naj ayko ishowal yinh eb'naj Israel, ahti tzoti' tx'oj yul isti' yinh eb'naj.

²²Lahwi tu' yalni ya' Josué: «Iwelo ismajil ch'en nhach'en, kat hey-inilti eb'naj howanh rey eb'ab'il isb'a b'ey tu',» xhi ya'. ²³Isyijen eb'naj haka' yalni ya' Josué, yinilti eb'naj eb'naj yul ch'en nhach'en tu'; naj is-reyal konhob' Jerusalén, yeb' naj isreyal konhob' Hebrón, yeb' naj isreyal konhob' Jarmut, yeb' naj isreyal konhob' Laquis, yeb' naj isreyal konhob' Eglón. ²⁴Hayet yilaxti eb'naj tet ya' Josué, yawten ya' Josué sunil eb'naj winaj Israel, yalni ya' tet eb'naj yahawil yinh eb'naj soldado ayko isk'atanh: «Hitzanhwekoj, kat heyanyo heyoj yib'anh isnuq'^s hunteq'an eb'naj ti',» xhi ya'. Isyijen eb'naj tzet yal ya' tu'.

²⁵Yalni ya' Josué haka' ti': «Mach chexxiwi, machi kab'kon hek'ul; wal xin aweko yip heyannya, linhb'awe heb'a, yuto hak ti' chiyute Komam hunteq'anxa eb'naj ayko ishowal jinh,» xhi ya' Josué.

²⁶Lahwi tu', ispotx'nikamo ya' Josué eb'naj howanh rey tu', ist'unh-b'alaxkanokan eb'naj yinh hunun te' q'eb'taj masanto yinh q'ejb'iyal. ²⁷Haxa yet isq'ejb'ayo tu' xin, ischejni ya' Josué ilaxoyo isnimanil eb'naj, isto yalaxokto yul ch'en nhach'en b'ay yeb'a isb'a eb'naj. Yanikaniko eb'naj Israel hunteq'an ch'en nime ch'en ismajilo isti' ch'en nhach'en tu', aytoko ch'en ismajilo tu' tinanh.

²⁸Yinhtik'a hune' tz'ayik tu', ayk'ay konhob' Maceda yu ya' Josué, istanhtzenkanilo ya' konhob' tu'. Ispotx'nikamo eb'naj Israel sunil mak ay yul konhob' tu' yu ch'en espada, machi hunu mak kankanoj. Haka'tik'a utelax naj isreyal konhob' Jericó, hak tu' utelaxpaxo naj isreyal konhob' Maceda.

²⁹Lahwi tu', yel ya' Josué yeb' eb'naj Israel b'ey Maceda tu', isto eb'naj b'ey konhob' Libna, yaniko eb'naj howal yinh konhob' tu'. ³⁰Yaniko Komam hune' konhob' tu' yeb' isreyal yul isq'ab' eb'naj Israel. Ispotx'nikamo eb'naj sunil mak ay yul konhob' yu ch'en espada, istanhtzenpaxilo eb'naj sunil tzet ay b'ey tu', matxa hunu tzet kankanoj. Haka'tik'a utelax naj isreyal konhob' Jericó, haktik'apax tu' utelax naj isreyal konhob' Libna.

³¹Lahwi tu', yel ya' Josué yeb' sunil anma Israel b'ey Libna, isto b'ey konhob' Laquis, iswatx'enkanh eb'naj iscampamento iskawilal, yaniko

^s 10:24 Yanayo eb'naj yoj yib'anh isnuq' eb'naj, hune' tu' chal yelapnoj ta q'ojkano eb'naj yinh howal yeb' xin chi'okkanto hunteq'an anma tu' yalanh yip eb'naj.

eb'naj howal yinh. ³²Haxa yet hunxa tz'ayik, yaniko Komam konhob' Laquis yul isq'ab' eb'naj Israel, ispotx'nikamo eb'naj sunil anma ay yul konhob' tu' yu ch'en espada. Istanhtzenkanilo eb'naj sunil tzet ay b'ey tu' haka'tik'a yute eb'naj konhob' Libna. ³³Wal naj Horam, isreyal konhob' Gezer, ahto naj yeb' issoldado kolwal yinh konhob' Laquis, yaja' xin tanhtzelaxpaxilo naj yeb' sunil iskonhob' yu ya' Josué.

³⁴Lahwi tu', yel ya' Josué yeb' Israel b'ey konhob' Laquis, isto ya' b'ey konhob' Eglón, iswatx'enkanh eb'naj iscampamento iskawilal konhob' Eglón tu', yaniko eb'naj howal yinh konhob' tu'. ³⁵Yinhtik'a hune' tz'ayik tu', ayk'ay konhob' yul isq'ab' eb'naj; ispotx'nikamo eb'naj sunil anma ay b'ey tu' yu ch'en espada, istanhtzenkanilo eb'naj sunil tzet ay b'ey tu', haka'tik'a yute eb'naj b'ey konhob' Laquis.

³⁶Lahwi tu' yel ya' Josué yeb' issoldado b'ey Eglón, yahto eb'naj b'ey konhob' Hebrón, yaniko eb'naj howal yinh konhob' tu'. ³⁷Yayk'ay konhob' tu' yul isq'ab' eb'naj, istanhtzenilo eb'naj sunil tzetaj ay b'ey tu', ispotx'nikamo eb'naj naj rey yeb' sunil anma ay b'ey tu' yu ch'en espada. Istanhtzenpaxilo eb'naj konhob' ayko yinh ishoyanil konhob' tu', haka'tik'a yute eb'naj konhob' Eglón.

³⁸Lahwi tu', yel ya' Josué yeb' issoldado b'ey Eglón, isto eb'naj b'ey konhob' Debir, yaniko eb'naj howal yinh konhob' tu'. ³⁹Yayk'ay konhob' tu' yul isq'ab' eb'naj. Ispotx'nikamo eb'naj naj rey yeb' sunil anma ay yul konhob' tu', istanhtzenpaxilo eb'naj ej konhob' ayayo yinhla ishoyanil. Matxa xin hunu mak kankano yul konhob' tu', sunil mak tanhkaniloj. Haka'tik'a utelax konhob' Hebrón yeb' konhob' Laquis yeb' isreyal, haktik'apax tu' yu konhob' Debir.

⁴⁰Hak tu' yu yaq'ni ayk'ayo ya' Josué sunil konhob' ayko yul ismajul tx'otx' tu'. Yaq' ayk'ayo ya' eb'naj rey ay yul ismajul tx'otx' Neguev, b'ey chewal tx'otx', yeb' satla ak'al, yinhla witz, ispotx'nikamo eb'naj Israel sunil anma ay yul hunteq'an konhob' tu', istanhtzenkanilo eb'naj sunil tzetaj ay b'ey tu'. Matxa hunu tzet kankanoj, haka'tik'a yu yalnikanano Komam Jahawil tet eb'naj, Komam isDiosal eb'naj Israel tu'. ⁴¹Yaq' ayk'ayo ya' Josué eb'naj rey tu' yinh hunelnhe, yinikanik'o eb'naj Israel istx'otx' eb'naj; ichiti b'ey Cades-barnea masanta b'ey Gaza, yeb' sunil ismajul Gosén, masanta b'ey konhob' Gabaón. ⁴²Sunil eb'naj rey tanhilo yu ya' Josué, ismajnayo ya' istx'otx' eb'naj yuto ha' Komam Dios Jahawil, isDiosal eb'naj Israel, kolwa yinh eb'naj yaniko howal. ⁴³Lahwi tu', ismeltzo ya' Josué yeb' sunil eb'naj Israel b'ey campamento b'ey Gilgal.

Q'oji ya' Josué yinh naj rey Jabín yeb' yinh hunteq'anxa eb'naj

11 ¹Hayet yab'enilo naj rey Jabín, isreyal konhob' Hazor sunil tu', ischejnito naj ischejab' tet naj rey Jobab, isreyal konhob' Madón, yeb' tet eb'naj isreyal Simrón yeb' Acsaf, yunhe iskutxb'aniko isb'a eb'naj

isto yinh howal, ²yanipaxto naj ischejab' tet eb'naj isreyal konhob' ay yul ismajul tx'otx' chewal tx'otx', ayko yinh yetk'ulal norte, yeb'paxo eb'naj isreyal konhob' ayayo satla ak'al, yeb'paxo isti' ha' Jordán, yetk'ulal sur yalanha ha' lago Cineret, yeb' eb'naj ay b'ey sat ak'al, iskawilal konhob' Dor yetk'ulal b'ay chito tz'ayik.[†] ³Yeb' eb'naj cananeo ay yinh yetk'ulal b'ay chi'ahilo tz'ayik, yeb' eb'naj ayayo yetk'ulal b'ay chito tz'ayik; yeb'paxo eb'naj amorreo, yeb' eb'naj hitita, yeb' eb'naj ferezeo, yeb' eb'naj jebuseo ay yinh chewal tx'otx', yeb'paxo eb'naj heveo ay yinh tzalan Hermón yul ismajul tx'otx' Mizpa. ⁴Sunil eb'naj rey tu', elti eb'naj yeb' sunil issoldado, kaw xin tx'i'alkano no' cheh yeb' carruaje yet howal iq'b'il yu eb'naj. Kaw tzetk'akano eb'naj soldado tu', matxa chib'ischa eb'naj, lahanxa isb'isil eb'naj haka' arena ay isti' ha' mar. Kaw tzetk'a-paxo ischeh eb'naj iq'nhe carruaje yet howal. ⁵Iskutxb'an isb'a sunil eb'naj tu' isti' ha' lago Merom; iswatx'enkanh eb'naj iscampamento yu yaniko eb'naj howal yinh eb'naj Israel.

⁶Yalni Komam Jahawil tet ya' Josué: «Mach chaxhxiwi, yuto yet hekal haka' hora ti' sunil eb'naj tu' chi'ayk'ay tesataj hex Israelex ti', kat iskamkaniloj. Yaja' hex ti' xin chemaq'ilito yoj ischeh eb'naj, kat henhusnikanto iscarruaje eb'naj yet howal tu',» xhi Komam.

⁷Isto ya' Josué yeb' sunil eb'naj soldado Israel isti' ha' lago Merom, tona nahul ay eb'naj ayko ishowal yinh ya' Josué yet yapni lemna eb'naj Israel yinh eb'naj. ⁸Yaniko Komam Jahawil eb'naj yul isq'ab' eb'naj Israel, yayk'ay eb'naj yu eb'naj yulaj b'eh, masanto apni eb'naj b'ey niman konhob' Sidón, yeb' konhob' Misrefot-maim, yeb' b'ey ak'al Mizpa ayko yinh yetk'ulal b'ay chito tz'ayik. Sunil eb'naj ispotx'kamo eb'naj Israel tu', matxa xin hunu eb'naj kolchakanøj. ⁹Wal ya' Josué kaw isyije ya' tzet yal Komam Jahawil. Ismaq'ilito ya' yoj ischeh eb'naj, isnhusnito ya' iscarruaje eb'naj yet howal.

¹⁰Lahwi tu' ismeltzo ya' Josué yeb' eb'naj Israel, yok eb'naj yul konhob' Hazor b'ay iskutxb'a isb'a sunil eb'naj aniko howal yinh eb'naj Israel tu'. Ispotx'nikamo ya' Josué isreyal konhob' tu'. ¹¹Ispotx'nikamo sunil anma ay yul konhob' tu', istanhtzenkanilo eb'naj sunil tzet ay b'ey tu', isnhusnikanto eb'naj konhob'.

¹²Haka'tik'a yu eb'naj Israel yinh konhob' Hazor, hak tu' yu eb'naj yinh hunteq'anxa iskonhob' eb'naj rey iskutxb'a isb'a yu yaniko howal yinh eb'naj Israel. Ok eb'naj Israel yul iskonhob' eb'naj tu', ispotx'nikamo eb'naj isreyal konhob', istanhtzenkanilo eb'naj sunil hunteq'an konhob' tu' haka'tik'a yu yalniano ya' Moisés, ischejab' Komam Dios yet yalanhtokanoj. ¹³Yaja' wal hunteq'an konhob' ayko yinhla iswi' wonhan, mach isnhusilo eb'naj, kachannhe konhob' Hazor wal tu' isnhusilo ya' Josué

[†] 11:2 *Cineret*, ha' hunxa isb'i ha' lago Galilea, Dt. 3:17; Jos. 12:3.

tu'. ¹⁴Ispotx'nikamo eb'naj sunil anma ay yul hunteq'an konhob' tu' yu yespada, machi xin hunu mak itzitz yakano eb'naj. Yokkano isnoq' anma tu' yu eb'naj yeb' tzetaj ay yul hunteq'an konhob' tu'. ¹⁵Yaq'kano Komam Dios chejb'anile tet ya' Moisés ischejab', haxa xin ya' Moisés tu' aq'nikano chejb'anile tu' tet ya' Josué, isyijen ya' sunil chejb'anile tu', machi hunu ti' mach isyije ya'.

Ya' Josué okkano ya' yahawilo yinh sunil tx'o tx'otx'

¹⁶Yinikanik'o ya' Josué sunil hunteq'an tx'o tx'otx' tu', ha' ton tx'otx' chewal tx'otx', yeb' ismajul Neguev, yeb' sunil tx'otx' Gosén, yeb' sunil ak'al, tx'otx' Arabá, yeb' sunil tx'otx' chewal tx'otx' ayxatik'a yul isq'ab' eb'naj Israel yeb' yak'alil. ¹⁷Ha' ton tx'otx' chi'ichiti b'ey witz Halac, kat isto b'ey tx'otx' Seir, masanta b'ey Baal-gad ayayo yul yak'alil tx'otx' Líbano, yeb' yich witz Hermón. Istzab'nayo ya' Josué sunil eb'naj isrey'al hunteq'an konhob' tu', ispotx'nikamo ya' eb'naj. ¹⁸Kaw xin tx'i'al ej tz'ayik yaq'le howal ya' Josué yeb' eb'naj rey tu'. ¹⁹Hanhe xin eb'naj heveo ay b'ey konhob' Gabaón ist'inhb'akano istzoti' yeb' eb'naj Israel, wal sunil hunteq'anxa konhob' xin, istanhtzekanilo eb'naj Israel yet yaniko eb'naj howal yinh. ²⁰Yuto yaq' kawb'olo Komam Dios, Jahawil yanma eb'naj, yaniko eb'naj howal yinh eb'naj Israel, yunhe istanhtzelaxkanilo eb'naj yu eb'naj Israel tu'. Machi xin tz'ay isk'ul eb'naj istanhtzenkanilo eb'naj, haka'tik'a yu yalnikanano Komam tet ya' Moisés.^u

²¹Yinh hunteq'an tz'ayik tu', q'oji ya' Josué yinh sunil iskonhob' eb'naj anaceo, istanhtzenkanilo ya' yinh hunelnhe; ha' ton konhob' ay b'ey chewal tx'otx'; konhob' Hebrón, yeb' konhob' Debir, yeb' konhob' Anab, yeb' tx'otx' chewal tx'otx' ismajul Judá, yeb' yul ismajul Israel. ²²Hak tu' xin, matxa hunu eb'naj winaj kaw nimej istel, titna yinh naj Anac kankano yul ismajul eb'naj Israel, kachannhe b'ey konhob' Gaza, yeb' b'ey konhob' Gat, yeb' b'ey konhob' Asdod, kantokano yik'al naj Anac.

²³Hak tu' yu yinikanik'o ya' Josué sunil tx'o tx'otx' tu', haka'tik'a yu yalnikanano Komam tet ya' Moisés. Lahwi tu', ispohnikanh ya' Josué sunil tx'o tx'otx' tu' yinh hunun majan eb'naj Israel, yunhe yokkano tx'otx' yu eb'naj yinh hunelnhe. Lahwi tu' xin, yok aq'ank'ulal sat tx'otx' yu matxa howal.

Hunteq'an eb'naj rey b'ay q'oji ya' Moisés

12 ¹Ha' ton hunteq'an eb'naj rey ti' ayk'ay yu eb'naj Israel b'ey isq'axeb'ik'to ha' Jordán, yinh yetk'ulal b'ay chi'ahilo tz'ayik, yeb'paxo tx'o tx'otx' yikanik'o eb'naj. Ha' ton tx'otx' chi'ichito b'ey ha' Arón, masanta b'ey witz Hermón, yeb' sunil tx'otx' yak'alil isti' ha' Jordán.

^u 11:20 Dt. 7:16

²Q'oji eb'naj Israel tu' yinh naj rey Sehón, ay b'ey konhob' Hesbón, isreyal anma amorreo. Ha' xin tx'otx' ismajul naj tu', chi'ichito tx'otx' b'ey konhob' Aroer, isti' ha' Arnón masanta chi'apni yiktab'al hokan isti' ha' Jaboc, b'ay chi'ichiko istx'otx' eb'naj amonita, yiktab'al tx'otx' Galaad. ³Yeb'paxo tx'otx' isti' ha' Jordán yinh yetk'ulal b'ay chito tz'ayik, chi'ichito tx'otx' yinh ha' Cineret, masanta b'ey ha' Mar K'achi', yinh is-toholal Bet-jesimot, masanta yinh yetk'ulal sur, yich witz Pisga.'

⁴Isq'ojipaxo eb'naj Israel tu' yinh naj Og, isreyal tx'otx' Basán, ha' xin naj islahob'al rey yinh eb'naj refaíta, ek'léna b'ey konhob' Astarot yeb' b'ey konhob' Edrei. ⁵Ha' xin ismajul naj chi'ichito tx'otx' b'ey witz Hermón yeb' Salca, kat isto tx'otx' sunil yul ismajul tx'otx' Basán, masanta chi'apni tx'otx' yinh ismohonal tx'otx' Gesur yeb' Maaca, masanta b'ey yiktab'anil tx'otx' Galaad, ayko yul ismajul naj rey Sehón, ay b'ey konhob' Hesbón.

⁶Q'oji ya' Moisés, ischejab' Komam Dios yeb' eb'naj Israel yinh eb'naj rey tu', yaq'nikano ya' Moisés istx'otx' eb'naj tu' tet eb'naj Israel titna yinh ya' Rubén, yeb' eb'naj titna yinh ya' Gad, yeb' tet yikta majan eb'naj titna yinh ya' Manasés.

Q'oji ya' Josué yinh hunteq'an eb'naj rey

⁷Ha' ton hunteq'an eb'naj rey ti' ayk'ay yu ya' Josué yeb' yu eb'naj Israel, isq'axeb'ik'ti ha' Jordán, yinh yetk'ulal b'ay chito tz'ayik. Chi'ichiti b'ey Baal-gad yak'alil Líbano, masanta yich witz Halac, chi'ahapno b'ey Seir. Ispohnikanh ya' Josué istx'otx' eb'naj rey tu' yinh hunun majan eb'naj Israel, yokkano tx'otx' yu eb'naj yinh hunelnhe. ⁸Ha' ton tx'otx' chewal tx'otx', yeb' ej tx'otx' ak'al, yeb' tx'otx' ayayo isti' ha' Jordán, yeb' tx'otx' ayko yinh q'ehan, yeb' tx'otx' ayko yul ismajul tx'otx' desierto, yeb' tx'otx' Neguev. Hunteq'an tx'otx' tu', yettik'a eb'naj hitita yeb' eb'naj amorreo, yeb' eb'naj cananeo, yeb' eb'naj ferezeo, yeb' eb'naj heveo, yeb' eb'naj jebuseo ye tx'otx'.

⁹Ha' eb'naj rey b'ay q'oji eb'naj Israel tu', ha' ton eb'naj ti': naj isreyal konhob' Jericó, yeb' naj isreyal konhob' Hai, ayko iskawilal Bet-el, ¹⁰naj isreyal Jerusalén, naj isreyal konhob' Hebrón, ¹¹naj isreyal konhob' Jar-mut, naj isreyal konhob' Laquis, ¹²naj isreyal konhob' Eglón, naj isreyal konhob' Gezer, ¹³naj isreyal konhob' Debir, naj isreyal konhob' Geder, ¹⁴naj isreyal konhob' Horma, naj isreyal konhob' Arad, ¹⁵naj isreyal konhob' Libna, naj isreyal konhob' Adulam, ¹⁶naj isreyal konhob' Ma-ceda, naj isreyal konhob' Bet-el, ¹⁷naj isreyal konhob' Tapúa, naj isreyal konhob' Hefer, ¹⁸naj isreyal konhob' Afec, naj isreyal konhob' Sarón, ¹⁹naj isreyal konhob' Madón, naj isreyal konhob' Hazor, ²⁰naj isreyal

v 12:3 Ha' Mar K'achi', hunxa isb'i Mar Kamom.

konhob' Simron-merón, naj isreyal konhob' Acsaf, ²¹naj isreyal konhob' Taanac, naj isreyal konhob' Meguido, ²²naj isreyal konhob' Cedés, naj isreyal konhob' Jocneam, ay b'ey Carmelo, ²³naj isreyal konhob' Dor, ayko yul ismajul tx'otx' Dor, naj isreyal konhob' Goim ay yul ismajul Gilgal, ²⁴yeb' naj isreyal konhob' Tirsá. Yinh sunil, ³¹ (hunlahonheb' iskawinaj) eb'naj isreyal hunteq'an konhob' ti'.

2. ISPOHKANH YA' JOSUÉ TX'O TX'OTX' YINH HUNUN MAJAN EB'NAJ ISRAEL

(13:1—22:34)

Hunteq'an konhob' tolto chiq'o'ji ya' Josué yinh

13 ¹Hayet kaw ichamxa ya' Josué, yalni Komam Dios tet ya': «Kaw icham hachxa, kaw ayxa hahab'ilal, kaw xin ayto tx'o tx'otx' maxhto chi'ok yul haq'ab'.

²»Ha' tx'otx' maxhto cheyiloj, ha' ton tx'otx' yet eb'naj filisteo, yeb' tx'otx' yet eb'naj gesureo. ³Chi'ichiti tx'otx' b'ey ha' Sihor, yinh yetk'ul'al b'ay chi'ahilo tz'ayik yinh Egipto, masanta chi'apni yinh ismohonal Ecrón, yinh yetk'ul'al norte; ha' tx'otx' xin istx'otx' eb'naj cananeo. Ha' tu' xin ay howanh eb'naj yahawil eb'naj filisteo, ha' ton eb'naj yahawil konhob' Gaza, konhob' Asdod, konhob' Ascalón, konhob' Gat, yeb' konhob' Ecrón. Aytopaxo tx'otx' yul ismajul eb'naj aveo, ⁴yinh yetk'ul'al sur; yeb'paxo sunil istx'otx' eb'naj cananeo, chi'ichiti b'ey konhob' Mehara, ayko yul ismajul eb'naj sidonio, masanta chi'apni b'ey Afec, yinh ismohonal istx'otx' eb'naj amorreo. ⁵Aytopaxo istx'otx' eb'naj giblita, yeb' sunil tx'otx' Líbano ayko yinh yetk'ul'al b'ay chi'ahilo tz'ayik, chi'ichiti b'ey konhob' Baal-gad, b'ey yich witz Hermón, masanta b'ay chonho-kapno b'ey Hamat.

⁶»Chintanhtzekanilojan yinh sat eb'naj Israel sunil anma ay b'ey tx'otx' chewal tx'otx', chi'ichiti b'ey Líbano, masanta b'ey Misrefot-maim, yeb' sunil anma sidonio. Haxa hach xin chaxhok hapoho'kanh tx'otx', kat hawaq'nikano ismajul eb'naj Israel haka'tik'a yu walnihan tawet. ⁷Chapohkanh tx'otx' yinh b'alonheb' majan eb'naj Israel, yeb' yinh yiktaxa majan eb'naj titna yinh ya' Manasés,» xhi Komam tet ya' Josué.

⁸Wal eb'naj Israel titna yinh ya' Rubén, yeb' yinh ya' Gad, yeb' yikta majan eb'naj Manasés, ischakano eb'naj ismajul tet ya' Moisés, ischejab' Komam Jahawil b'ey isq'axeb'ik'to ha' Jordán, yinh yetk'ul'al b'ay chi'ahilo tz'ayik. ⁹Yiq' eb'naj tx'otx' chi'ichiko b'ey konhob' Aroer, ayayo isti' ha' Arnón, yeb' konhob' ayayo sata ak'al, yeb' sunil yak'alil tx'otx' Medeba, masanta chi'apni b'ey konhob' Dibón. ¹⁰Yinipaxilo eb'naj sunil iskonhob' naj Sehón, ay b'ey Hesbón, isreyal anma amorreo, masanta chi'apni yinh ismohonal istx'otx' eb'naj amonita. ¹¹Yinipaxilo eb'naj tx'otx' Galaad,

yeb' istx'otx' eb'naj gesureo, yeb' istx'otx' eb'naj maacateo, yeb' sunil witz Hermón, yeb' sunil tx'otx' Basán, masanta chi'apni b'ey konhob' Salca. ¹²Yeb' sunil tx'otx' ismajul naj Og, isreyal tx'otx' Basán, isreyal konhob' Astarot yeb' konhob' Edrei. Ha' naj Og tu' islahob'al rey xol eb'naj refaíta. Ha' eb'naj tu' q'oji ya' Moisés yinh, yinilo ya' eb'naj sat istx'otx'. ¹³Yaja' wal eb'naj ah Gesur, yeb' eb'naj ah Maaca, mach ilaxilo eb'naj sat istx'otx', kankano eb'naj xol eb'naj Israel, masanto tinanh.

Tx'otx' pohb'ilkano yu ya' Moisés

¹⁴Wal eb'naj Israel titna yinh ya' Leví, mach istx'otx' eb'naj yaq' ya' Moisés, yuto yet eb'naj ye yeb'alq'ab'e chihaltelax yinh xahanb'alil tet Komam Dios, Jahawil, isDiosal anma Israel, haka'tik'a yu yalni Komam.^w

¹⁵Yaq'ni ya' Moisés istx'otx' eb'naj titna yinh Rubén; haka'tik'a isb'isil eb'naj hak tu' tx'otx' ischakanilo eb'naj. ¹⁶Ha' istx'otx' eb'naj tu' chi'ichiti b'ey konhob' Aroer, ayayo isti' ha' Arnón, kat yek' b'ey konhob' ayayo yiktab'al hokan yeb' yinh nimeta ak'al masanta yinh tx'otx' Medeba, ¹⁷masanta chi'apni tx'otx' b'ey Hesbón, yeb' b'ey sunil konhob' ayayo yul nimeta ak'al tu', ha' ton konhob' Dibón, konhob' Bamot-baal, konhob' Bet-baal-meón; ¹⁸yeb' konhob' Jahaza, konhob' Cademot, konhob' Mefaat, ¹⁹yeb' konhob' Quiriataim, konhob' Sibma, konhob' Zaret-sahar, ayko yinh iswonhanil ak'al tu', ²⁰yeb' konhob' Bet-peor, konhob' Bet-jesimot, yeb' istzalanil witz Pisga, ²¹ha' ton konhob' ayayo yul ak'al, yeb' sunil tx'otx' ismajul naj Sehón, isreyal anma amorreo, ay b'ey Hesbón. Ha' naj rey Sehón tu', q'oji ya' Moisés yinh naj, yeb' yinh eb'naj yahawil ay b'ey Madián, ayikto yalanh yip naj Sehón, ha' ton naj Evi, naj Requiem, naj Sur, naj Hur, yeb' naj Reba. ²²Ispotx'nipaxo eb'naj Israel naj Balaam, naj ahb'elom, isk'ahol naj Beor, tx'i'al hunteq'anxa eb'naj potx'laxpaxo yinta naj. ²³Eb'naj Israel titna yinh ya' Rubén tu', istx'otx' eb'naj ch'apni yinh isti' ha' Jordán. Haka'tik'a isb'isil eb'naj hak tu' istx'otx' eb'naj aq'laxi yeb' hunteq'an konhob' yeb' ej yaldeahil.

²⁴Yaq'nipaxo ya' Moisés istx'otx' eb'naj Israel titna yinh ya' Gad, haka'tik'a isb'isil eb'naj tu', hak tu' istx'otx' eb'naj ischah. ²⁵Yok eb'naj yahawo tx'otx' Jazer, yeb' sunil konhob' ayayo sat tx'otx' Galaad, yeb' yikta istx'otx' eb'naj amonita, masanta chi'apni b'ey konhob' Aroer, satak'ti konhob' Rabá. ²⁶Ischahnilo eb'naj tx'otx' ayayo xolb'al Hesbón yeb' Ramat-mizpa yeb' Betonim, yeb' tx'otx' ayayo xolb'al Mahanaim, chi'apni sat mohon Debir. ²⁷Ischahnilo eb'naj tx'otx' ak'al, b'ay ayayo Bet-aram, Bet-nimra, Sucot, yeb' Zafón, yuto haxanhe tx'otx' tu' istx'otx' naj Sehón, isreyal Hesbón aykanoj. Yuxin ha' istx'otx' eb'naj Gad ischah, chi'ichiti tx'otx' yinh ha' Jordán yinh yetk'ulal b'ay chi'ahilo tz'ayik masanta

^w 13:14 Dt. 18:1-2; Nm. 18:20

chi'apni tx'otx' yinh ha' Cineret yinh yetk'ulal sur. ²⁸Ha' hunteq'an konhob' yeb' yaldeahil tu', okkano yu eb'naj Gad. Haka'tik'a xin isb'isil eb'naj tu', hak tu' istx'otx' eb'naj ischah.

²⁹Yaq'nipaxkano ya' Moisés istx'otx' yikta majan eb'naj Israel titna yinh ya' Manasés. Haka'tik'a isb'isil eb'naj tu', hak tu' istx'otx' eb'naj aq'laxi. ³⁰Eb'naj tu', yiq' eb'naj sunil istx'otx' naj Og, isreyal Basán, chal yelapnoj sunil tx'otx' Basán; chi'ichiti b'ey Mahanaim, yeb' 60 konhob' ay yul ismajul Jair, ³¹masanta yiktab'al tx'otx' Galaad, kat yapnikano b'ey konhob' Astarot, yeb' konhob' Edrei, iskonhob' naj rey Og. Ha' sunil tu', ischah anma Israel titna yinh naj Maquir, isk'ahol ya' Manasés. Haka'tik'a xin isb'isil eb'naj tu', hak tu' tx'otx' ischah eb'naj.

³²Ha' tx'otx' tu', yaq'kano ya' Moisés tet eb'naj b'ey yak'alil tx'otx' Moab, ayayo isq'axeb'ik'to ha' Jordán, satak'ti konhob' Jericó. ³³Yaja' wal eb'naj Israel titna yinh ya' Leví, mach istx'otx' eb'naj aq'lax ismajuloj, yuto hal-lax tet eb'naj tato ha' Komam Dios Jahawil, isDiosal anma Israel, ha' ismajul eb'naj.

Pohlaxkanh tx'otx' Canaán

14 ¹Ischah eb'naj Israel tx'otx' Canaán ismajuloj, yaq'laxkano tx'otx' tet eb'naj Israel yu ya' sacerdote Eleazar, yeb' yu ya' Josué isk'ahol ya' Nun, yeb' yu eb'naj yahawil yinh hunun majan eb'naj Israel. ²Pohlaxkanh tx'otx' yinh suertehal yinh eb'naj b'alonghwanh majan Israel, yeb' yinh yiktaxa majan eb'naj, haka' yu yalni Komam tet ya' Moisés. ³Wal eb'naj Israel titna yinh ya' Rubén, yeb' yinh ya' Gad, yeb' yikta majan eb'naj titna yinh Manasés, aq'laxkano istx'otx' eb'naj yu ya' Moisés b'ey isq'axeb'ik'to ha' Jordán, yaja' wal eb'naj Israel titna yinh ya' Leví, mach istx'otx' eb'naj aq'laxi. ⁴Ha' eb'naj Israel titna yinh ya' José, kab' majan eb'naj, ha' ton eb'naj titna yinh ya' Manasés yeb' yinh ya' Efraín, wal eb'naj Levita xin machi ismajul eb'naj ischah, kachan-nhe hunteq'an konhob' b'ay chi'eh eb'naj aq'lax tet, yeb' tx'o tx'otx' ayko yinhla ishoyanil konhob' tu' b'ay chilow isnoq' eb'naj. ⁵Haka'tik'a yu yalni Komam Dios tet ya' Moisés, hak tu' yu ispohnikanh eb'naj Israel tx'o tx'otx' tu' yinh.

Aq'lax tx'otx' Hebrón ismajulo ya' Caleb

⁶Eb'naj Israel titna yinh ya' Judá, to eb'naj b'ey konhob' Gilgal tzotelo tet ya' Josué, yalni ya' Caleb ya' cenezeo, isk'ahol naj Jefone tet ya' Josué haka' ti': «Natij tzet yalkano Komam Dios tawinh yeb' winhan tet ya' Moisés, ischejab' Komam Dios yet ayonh b'ey Cades-barnea. ⁷40 (Kawinaj) hab'il hinan yet ayonh b'ey Cades-barnea b'ay konhischejto ya' Moisés jila' tx'o tx'otx' ti'; haxa yet komeltzo xin, intzotelan yinh kaw isyelal. ⁸Wal eb'naj jet Israelal hulik'o jinta xin, ok eb'naj yaq'a' xiwokanh

isk'ul konhob', yaja' wal hinan xin, inyijehan wok tzujnojan yinh tzet yal Komam Dios, inDiosalan. ⁹Yuxin yaq' b'inaho ya' Moisés isb'i Komam Dios, yalni ya' wetan haka' ti': "Ha' tx'o tx'otx' kach b'ey hab'eytze' tu' hawet ye tx'otx', ha' tx'otx' hamajul yeb' hawuninal yinh sunilb'al ej tiempo, yuto hayije hawok tzujno yinta tzet yal Komam Dios, koDiosal," xhikano ya' Moisés. ¹⁰Ha' hune' ti', 45 (howeb' yoxk'al) hab'ilxa yaln-kano ya' Moisés yu Komam Dios yet ayonh b'ey tx'otx' desierto; yu tzet halb'ilkano tu', yuxin itzitz intohan yu Komam, wal tinanh xin 85 (howeb' ishok'al) hab'il inxahan; ¹¹yaja' xin kaw ayto wipan chiwab'ehan tinanh haka' yet konhischejniti ya' Moisés kob'eytzeno tx'o tx'otx' ti', kaw xin ayto wipan tinanh wek'an yeb' waq'ni howalan haka' wipan yet yalanhtokanoj. ¹²Yuxin chinq'anan tawet tato chawaq' tx'otx' chewal tx'otx' tu' wetan, haka' yu yalni Komam wetan yet hunel tu'. Hataxtik'a tu' hawab'enkanoj tato eb'naj anaceo^x ayayo sat tx'otx', kaw xin nimej iskonhob' eb'naj tu', yeb' xin ayko ch'en k'ub' yinhla ishoyanil; yaja' xin chikawxi ink'ulan ta chi'ok Komam Dios wetb'ihojan, kat iskolwa winhan winilojan eb'naj sat tx'otx', haka' yu yalni Komam,» xhi ya' Caleb.

¹³Hak tu' yu isq'annikano ya' Josué isk'ulal Komam yib'anh ya' Caleb, isk'ahol naj Jefone, yaq'nikano ya' Josué tx'otx' Hebrón ismajulo ya' Caleb yeb' tet yuninal. ¹⁴Hak tu' yu yokkano tx'otx' Hebrón yu ya' Caleb, isk'ahol naj Jefone, naj cenezeo, yuto isyije ya' yok tzujno yinh tzet yal Komam Dios, isDiosal anma Israel, yetto xin ya' tx'otx' tinanh. ¹⁵Ha' konhob' Hebrón tu', Quiriat-arba tik'a isb'i yet kaw payat, yuto Arba isb'i hune' naj kaw aykano yelapnoj ay b'ey tu', titna naj yinh naj Anac, naj kaw nimajalkano istel.

Hato xin yet yiq'nikano hunun majan eb'naj Israel istx'otx', yokkano aq'ank'ulal sat tx'otx' yu matxa howal.

Istx'otx' eb'naj titna yinh ya' Judá

15 ¹Ha' tx'o tx'otx' yiq' hune' majan eb'naj Israel titna yinh ya' Judá yinh suertehal, chi'apni tx'otx' yinh ismohonal tx'otx' Edom, haxa yinh yetk'ulal sur chitaapni tx'otx' yinh tx'otx' desierto Zin.

²Haxa ismohonal tx'otx' yinh yetk'ulal sur, chi'ichiti yinh ha' Mar Kachi, ³kat isto ismohonal tx'otx' yinh yetk'ulal sur yinh isq'ehanal Acrabim, kat isto yinh tx'otx' desierto Zin, kat yek' yetk'ulal sur yinh konhob' Cades-barnea, kat yek'paxo b'ey konhob' Hezrón, kat yahapno b'ey konhob' Adar, kat yek' ishoyno konhob' Carca. ⁴Kat istopaxoj kat yapni yinh konhob' Asmón, kat yelapno b'ey ha ha' yul yet Egipto, kat yapnikano yinh ha' mar Mediterráneo, ha' tu' ismohonal tx'otx' yinh yetk'ulal sur. ⁵Haxa ismohonal tx'otx' yinh yetk'ulal b'ay chi'ahilo tz'ayik

^x 14:12 *Eb'naj anaceo*, kaw nimej istel. Jos. 11:21; Jue. 1:20; Nm. 13:33.

chi'ek' yinh isti' ha' Mar Kachi, masanta b'ay chi'okapno ha' Jordán yul ha' mar tu'. Ha' b'ey tu', xin chi'ichipaxti ismohonal tx'otx' yinh norte, ⁶kat yahapno ismohonal tx'otx' tu' yinh konhob' Bet-hogla, kat yek' yinh yetk'ulal norte yinh konhob' Bet-arabá, chi'el b'ey tu' kat yapni yich ch'en ch'en yet naj Bohán, isk'ahol ya' Rubén.

⁷Lahwi tu' xin, kat yahapno ismohonal tx'otx' tu' yul ak'al yet Acor, kat isto b'ey Debir, kat ismeltzo b'ey konhob' Gilgal ayko satak'ti istzalanil Adumín, yinh yetk'ulal sur yinh hune' ha' nich'an ha', kat yek'to ismohonal tx'otx' b'ey isnuq' ha' ha' En-semes, masanta chi'apni b'ey isnuq' ha' ha' Rogel. ⁸Lahwi tu', kat yek' ismohonal tx'otx' b'ey hune' hokan yet isk'ahol naj Hinom, yinh yetk'ulal sur yinh witz Jebús, ha' ton konhob' Jerusalén, kat yek' yinh iswi' hune' witz ayayo yinh yetk'ulal b'ay chito tz'ayik yinh hokan Hinom, yeb' yetk'ulal norte yinh hokan Refaim; ⁹kat ismeltzo ishoyni iswi' witz tu' masanta b'ey isnuq' ha' b'ey Neftoa, kat yapni b'ey hunteq'an konhob' ayayo yich witz Efrón, kat istopaxo b'ey konhob' Baala chihal-laxpaxo Quiriat-jearim, ¹⁰kat ismeltzo ismohonal yinh Baala tu' yinh yetk'ulal b'ay chito tz'ayik masanta b'ey witz Seir, kat yek'paxo b'ey konhob' Quesalón yinh yetk'ulal norte yinh isk'ul witz Jearim; lahwi tu' kat yayilo b'ey konhob' Bet-semes, kat yek' b'ey konhob' Timna. ¹¹Kat yahpaxo yinh isk'ul witz yinh yetk'ulal norte yinh konhob' Ecrón, kat ishoyni konhob' Sición, kat yek'paxo b'ey witz Baala, kat yelapno b'ey konhob' Jabneel, kat yapnikano yinh ha' Niman Mar.^y ¹²Haxa ismohonal tx'otx' tu' yinh yetk'ulal b'ay chito tz'ayik, ha' ton ha' niman Mar. Ha' tu' ismohonal tx'o tx'otx' aq'lax tet eb'naj Israel titna yinh ya' Judá, pohlaxkanh tx'otx' yinh eb'naj mame yinh hunun nhahil anma.

Q'o'ji ya' Caleb yinh konhob' Hebrón yeb' yinh konhob' Debir

(Jue. 1:10-15)

¹³Yaq' ya' Josué istx'otx' ya' Caleb, isk'ahol ya' Jefone yinh ismajul eb'naj titna yinh ya' Judá, haka'tik'a yu yalni Komam Jahawil; yiq' ya' Caleb tu' konhob' Quiriat-arba, ha' ton konhob' Hebrón. Ha' konhob' Hebrón tu', ha' iskonhob' naj Arba yet payat; naj Arba tu', ha' naj ismam naj Anac, naj kaw nimajal istel.^z ¹⁴Oxwanh xin eb'naj isk'ahol naj Anac tu' istzumb'elo ya' Caleb sat konhob' Hebrón tu', ha' ton naj Sesai, naj Ahimán yeb' naj Talmai. ¹⁵Lahwi tu', yahto ya' Caleb yinh anma ay yul konhob' Debir; ha' konhob' Debir tu', Quiriat-sefer isb'i yet payat. ¹⁶Yalni ya' Caleb haka' ti': «Ha' mak chi'aniko howal yinh konhob' ti', kat isq'o'ji yinh, chiwaq'an inkutz'inan, ix Acsa yixaloj,» xhi ya'.

^y 15:11 Hunxa isb'i ha' Niman Mar, ha' ton *Mediterráneo*. ^z 15:13 Gn. 13:18; Jos. 14:15; Jue. 1:20

¹⁷Ha' ya' Otoniel isk'ahol yuxhta ya' Caleb, ha' ton naj Cenaz, aniko howal yinh konhob' Debir; isq'oji ya' yinh. Yu hune' tu' yuxin yako ya' Caleb ix Acsa, iskutz'in, yixalo ya' Otoniel.^a ¹⁸Hayet lanhan isto ya' Otoniel yeb' yixal b'ey yatut, yok ya' yalno tet ix tato chisq'an ix istx'otx' tet ismam yeto tz'unub'. Yuxin ayti ix yib'anh no' burro, isq'amb'en ismam ix tet:

—¿Tzet chawoche? xhi ya' Caleb.

¹⁹Istaq'wi ix:

—Xahawaq' intx'otx'an b'ey tx'otx' Neguev,^b yuxin chinq'anan ta cha-waq'paxo intx'otx'an b'ay ay isnuq' ha ha', xhi ix.

Yu hune' tu' yuxin aq'laxpaxo istx'otx' ix yu ismam; tx'otx' b'ay ay isnuq' ha' iswi'laj yeb' yichlaj.

Hunteq'an konhob' yiq' eb'naj titna yinh ya' Judá

²⁰Ischah ismajul eb'naj titna yinh ya' Judá, hunun mame yeb' yuninal. ²¹Ha' xin konhob' yiq' eb'naj yinh tx'otx' ayko yinh yetk'ulal sur yinh ismohonal tx'otx' Edom, ha' ton konhob' Cabseel, konhob' Edar, konhob' Jagur, ²²kohob' Cina, konhob' Dimona, konhob' Adada, ²³kohob' Cedec, konhob' Hazor, konhob' Itnán, ²⁴kohob' Zif, konhob' Telem, konhob' Bealot, ²⁵kohob' Hazor-adata, konhob' Queriot, konhob' Hezrón chiyijpaxo Hazor, ²⁶kohob' Amam, konhob' Sema, konhob' Molada, ²⁷kohob' Hazar-gada, konhob' Hesmón, konhob' Bet-pelet, ²⁸kohob' Hazar-sual, konhob' Beerseba, konhob' Bizotia, ²⁹kohob' Baala, konhob' Iim, konhob' Esem, ³⁰kohob' Eltolad, konhob' Quesil, konhob' Horma, ³¹kohob' Siclag, konhob' Madmana, konhob' Sansana, ³²kohob' Lebaot, konhob' Silhim, konhob' Aín, yeb' konhob' Rimón. Ha' xin isb'isil hunteq'an konhob' tu', ²⁹ (b'alonheb' iskawinaj) yinh sunil, yeb' ej yaldeahil.

³³Haxa konhob' yiq' eb'naj ayayo sat ak'al, ha' ton konhob' Estaol, konhob' Zora, konhob' Asena, ³⁴kohob' Zanoa, konhob' En-ganim, konhob' Tapúa, konhob' Enam, ³⁵kohob' Jarmut, konhob' Adulam, konhob' Soco, konhob' Azeca, ³⁶kohob' Saaraim, konhob' Aditaim, konhob' Gedera, yeb' konhob' Gederotaim. Ha' xin isb'isil hunteq'an konhob' tu', ¹⁴ (kanhlahonheb') yinh sunil, yeb' ej yaldeahil.

³⁷Yiq'nipaxo eb'naj konhob' Zenán, konhob' Hadasa, konhob' Migdal-gad, ³⁸kohob' Deleán, konhob' Mizpa, konhob' Jocteel, ³⁹kohob' Laquis, konhob' Boscat, konhob' Eglón, ⁴⁰kohob' Cabón, konhob' Lahmam, konhob' Quitlis, ⁴¹kohob' Gederot, konhob' Bet-dagón, konhob' Naama yeb' konhob' Maceda. Ha' xin isb'isil hunteq'an konhob' tu', ¹⁶ (wajlahonheb') konhob' yinh sunil, yeb' ej yaldeahil.

^a 15:17 Naj Otoniel, ha' naj ok b'ab'el juesal yinh eb'naj Israel. Jue. 3:9. ^b 15:19 Ha' tx'otx' Neguev machi ha' sat tx'otx'.

⁴²Yiq'paxo eb'naj konhob' Libna, konhob' Eter, konhob' Asán,
⁴³kanhob' Jifta, konhob' Asena, konhob' Nezib, ⁴⁴kanhob' Keilla, konhob'
 Aczib, yeb' konhob' Maresa. Ha' xin isb'isil hunteq'an konhob' tu', b'alo-
 nheb' yinh sunil, yeb' ej yaldeahil.

⁴⁵Yiq'paxo eb'naj konhob' Ecrón yeb' nixhte konhob' yeb' yaldeahil.
⁴⁶B'ey konhob' Ecrón tu' masanta chi'apni b'ey ha' mar, yiq' eb'naj sunil
 tx'otx' ayayo iskawilal konhob' Asdod yeb' ej yaldeahil.

⁴⁷Yiq'nipaxo eb'naj konhob' Asdod yeb' sunil nixhte konhob' yeb'
 yaldeahil, yeb' konhob' Gaza yeb' nixhte konhob' yeb' yaldeahil, masanta
 chi'apni b'ey ha' nich'an ha' yet Egipto, yeb' isti'la ha' Niman mar.

⁴⁸Haxa b'ey tx'otx' chewal tx'otx', yiq' eb'naj konhob' Samir, konhob'
 Jatir, konhob' Soco, ⁴⁹kanhob' Dana, konhob' Quiriat-sana, chihal-lax-
 paxo Debir, ⁵⁰yeb' konhob' Anab, konhob' Estemoa, konhob' Anim,
⁵¹kanhob' Gosén, konhob' Holón yeb' konhob' Gilo. Ha' isb'isil hunteq'an
 konhob' tu', 11 (hunlahonheb') yinh sunil, yeb' ej yaldeahil.

⁵²Yiq'nipaxo eb'naj konhob' Arab, konhob' Duma, konhob' Esán,
⁵³kanhob' Janum, konhob' Bet-tapúa, konhob' Afeca, ⁵⁴kanhob' Humta,
 konhob' Quiriat-arba, chihal-laxpaxo Hebrón, yeb' konhob' Sior. Ha' is-
 b'isil hunteq'an konhob' tu' b'alonheb' yinh sunil, yeb' ej yaldeahil.

⁵⁵Yiq'nipaxo eb'naj konhob' Maón, konhob' Carmel, konhob' Zif,
 konhob' Juta, ⁵⁶kanhob' Jezreel, konhob' Jocdeam, konhob' Zanoa,
⁵⁷kanhob' Caín, konhob' Gabaa yeb' konhob' Timna. Ha' xin isb'isil hun-
 teq'an konhob' tu' 10 (lahonheb') yinh sunil, yeb' ej yaldeahil.

⁵⁸Yiq'nipaxo eb'naj konhob' Halhul, konhob' Bet-sur, konhob' Gedor,
⁵⁹kanhob' Maarat, konhob' Bet-anot, yeb' konhob' Eltecón. Ha' xin isb'isil
 hunteq'an konhob' tu', wajeb' yinh sunil yeb' ej yaldeahil.

⁶⁰Yiq'nipaxo eb'naj konhob' Quiriat-baal, chihal-laxpaxo Quiriat-jearim
 yeb' konhob' Rabá, yiq' eb'naj kab'eb' konhob' tu', yeb' yaldeahil.

⁶¹Yiq'paxo eb'naj konhob' ayayo sat tx'otx' b'ay machi ha', ha' ton
 konhob' Bet-arabá, konhob' Midín, konhob' Secaca, ⁶²kanhob' Nibsán,
 yeb' hune' konhob' yet Atz'am, yeb' konhob' En-gadi; wajeb' isb'isil hun-
 teq'an konhob' tu' yeb' ej yaldeahil.

⁶³Wal eb'naj jebuseo^c ay b'ey konhob' Jerusalén, mach ilaxilo eb'naj
 yu eb'naj titna yinh ya' Judá, yuxin kankano eb'naj jebuseo tu' xol eb'naj
 Judá masanta tinanh.

Istx'otx' ya' Efraín yeb' istx'otx' ya' Manasés

16 ¹Ha' tx'otx' ischah eb'naj titna yinh ya' José hatatik'a yinh-
 b'al, chi'ichiti tx'otx' yinh yetk'ulal b'ay chi'ahilo tz'ayik yinh

^c 15:63 Yet istz'ib'nhelax hune' hum ti' aytoyo eb'naj jebuseo sat tx'otx' Jerusalén, masanto
 yinh istiephal ya' David ilaxilo eb'naj sat istx'otx' tu'. Jue. 1:21; 2Sam. 5:6-9; 1Cr. 4:4.

ha' Jordán, kat yek' ismohonal tx'otx' b'ay ay isnuq' ha ha' b'ey Jericó, kat yek' ismohonal tx'otx' b'ey tx'otx' desierto, b'ey hunteq'an witz b'ey Jericó, chi'apni b'ey konhob' Bet-el. ²Palan yek'to ismohonal tx'otx' b'ey konhob' Bet-el, chihal-laxpaxo Luz, kat yek' ismohonal tx'otx' b'ay ay istx'otx' eb'naj arquita, masanta b'ey konhob' Atarot; ³kat istopaxo tx'otx' yinh yetk'ulal b'ay chito tz'ayik b'ey istx'otx' eb'naj jafletita, masanta ch'ek' ismohonal tx'otx' yinh ismohonal Bet-horón yichayoj masanta b'ey konhob' Gezer, kat yelapno b'ey ha' Niman Mar. ⁴Ha' ton tx'otx' ti' ischahkano eb'naj titna yinh ya' Manasés yeb' yinh ya' Efraín, eb'ya' isk'ahol ya' José.

⁵Ha' ismohonal istx'otx' eb'naj titna yinh ya' Efraín, chitaichiti tx'otx' b'ey Atarot-adar, yinh yetk'ulal b'ay chi'ahilo tz'ayik, masanto yinhahto Bet-horón; ⁶kat yek' ismohonal tx'otx' isti' ha' Niman mar, masanta b'ey konhob' Micmetat yinh yetk'ulal norte, kat isb'ey ishoyo' isb'a yinh yetk'ulal b'ay chi'ahilo tz'ayik masanta chi'apni b'ey konhob' Taanat-silo, lahwi tu' kat yek'to b'ey Janoa, ⁷kat yayapno b'ey konhob' Atarot, yeb' b'ey konhob' Naarat, masanta chi'apni b'ey konhob' Jericó, kat yelapno b'ey ha' Jordán, ⁸kat yichipaxti ismohonal tx'otx' b'ey konhob' Tapúa, kat isto yinh yetk'ulal b'ay chito tz'ayik masanta b'ey ha' nich'an ha' b'ey konhob' Caná, yeb' b'ey ha' Niman Mar. Ha' ton tx'otx' tu' ischah eb'naj titna yinh ya' Efraín, ispholaxkanh tx'otx' yinh hunun eb'naj mame yinh hunun majan. ⁹Aypaxo xin hunteq'an konhob' yeb' yaldeahil ayko yul ismajul istx'otx' eb'naj titna yinh ya' Manasés ischahpaxo eb'naj titna yinh ya' Efraín. ¹⁰Yaj xin mach istzumb'elo eb'naj titna yinh ya' Efraín tu' eb'naj cananeo ay b'ey konhob' Gezer,^d yaj isq'an eb'naj ch'en tohlab'al tet eb'naj; yexnheto xin ye eb'naj cananeo tu' xol eb'naj tinanh.

17 ¹Ha' tx'otx' ti' yiq' eb'naj titna yinh naj Maquir, naj isb'ab'el k'ahol ya' Manasés. Ha' xin ya' Manasés tu', ha' ya' isb'ab'el k'ahol ya' José; aq'lax tx'otx' tet eb'naj yinh suertehal. Naj Maquir tu', kaw helan naj yinh howal, naj ismam naj Galaad. Ha' tx'otx' Galaad yeb' tx'otx' Basán ayko yinh yetk'ulal b'ay chi'ahilo tz'ayik yinh ha' Jordán, ha' tx'otx' ischah naj Maquir tu'. ²Ischahpaxo hunteq'anxa isk'ahol ya' Manasés istx'otx', ispholaxkanh tx'otx' yinh eb'naj, yaj hatatik'a hunun majan nhahil eb'naj: naj Abiezer, naj Helec, naj Asriel, naj Siquem, naj Hefer, yeb' naj Semida, ha' eb'naj ti' hunteq'anxa isk'ahol ya' Manasés.

³Yaja' wal naj Zelofehad machi yuninal naj winaj, wal xin ixnhe howanh iskutz'in naj, ha' ton ix Maala, ix Noa, ix Hogla, ix Milca, yeb' ix Tirsa. Naj Zelofehad tu', isk'ahol naj Hefer ye naj, haxa naj Hefer isk'ahol naj Galaad ye naj, haxa naj Galaad isk'ahol naj Maquir ye ya', haxa naj Maquir isk'ahol ya' Manasés ye naj. ⁴Ha' eb'ix tu', to eb'ix isk'atanh ya'

^d 16:10 Gezer Jos. 10:33; 12:12.

sacerdote Eleazar yeb' isk'atanh ya' Josué yeb' isk'atanh eb'naj yahawil konhob'; yalni eb'ix: «Ha' Komam Dios halnikano tet ya' Moisés tato chi'-aq'lax kotx'otx'anh, haka' yaq'lax yet jet Israelanh,» xhi eb'ix. Hak tu' yu yaq'ni ya' Josué istx'otx' eb'ix, haka' yu yaq'lax istx'otx' eb'naj yuxhta ismam eb'ix, haka'tik'a yu yalnikano Komam Dios.^e

⁵Hak tu' yu ischahnikano eb'naj titna yinh ya' Manasés, 10 (lahonheb') majan istx'otx', nan xin yepaxo tx'otx' Galaad yeb' tx'otx' Basán, ay is-q'axeb'ik'ti ha' Jordán yinh yetk'ulal b'ay chi'ahilo tz'ayik. ⁶Wal xin aq'lax istx'otx' eb'ix haka' yu yaq'lax istx'otx' eb'naj winaj. Ha' tx'otx' Galaad tu', aq'lax tx'otx' tet hunteq'anxa eb'naj titna yinh ya' Manasés. ⁷Ha' istx'otx' eb'naj titna yinh ya' Manasés tu', chi'ichiti ismohonal tx'otx' b'ey konhob' Aser, masanta b'ey Micmetat, satak'ti Siquem, kat yek' ismohonal tx'otx' yinh sur, masanta b'ay ay isnuq' ha ha' b'ey konhob' Tapúa. ⁸Waxanhka yet eb'naj titna yinh ya' Manasés ye ismajul tx'otx' Tapúa, yaja' wal konhob' Tapúa hune'nhe yehayo ismohonal yeb' istx'otx' ya' Manasés tu', ayko yul isq'ab' eb'naj titna yinh ya' Efraín. ⁹Ha' tu' xin ch'ayilo ismohonal istx'otx' eb'naj titna yinh ya' Manasés yinh ha' nich'an ha' b'ey konhob' Caná yinh yetk'ulal sur, hak tu' yu iskankano hunteq'an iskonhob' eb'naj yik'al ya' Efraín yulikto ismohonal eb'naj tu'. Ismohonal istx'otx' eb'naj Manasés tu' ayko yetk'ulal norte b'ay ay ha ha' tu' yeb' b'ay chi'elilo isq'ab' ha' mar. ¹⁰Iskankano eb'naj titna yinh ya' Efraín yinh yetk'ulal sur yinh ha' nich'an ha' tu', haxa eb'naj titna yinh ya' Manasés kankano eb'naj yinh yetk'ulal norte yinh ha'. Iskankano istx'otx' eb'naj titna yinh ya' Aser yinh yetk'ulal norte yinh istx'otx' ya' Manasés, haxa eb'naj titna yinh ya' Isacar kankano eb'naj yinh yetk'ulal b'ay chi'ahilo tz'ayik yinh ismohonal istx'otx' ya' Manasés.

¹¹Ischahpaxo eb'naj titna yinh ya' Manasés hunteq'an konhob' ayko yul ismajul eb'naj titna yinh ya' Isacar yeb' yul ismajul eb'naj titna yinh ya' Aser. Ischah eb'naj hunteq'an konhob' tu' yeb' yaldeahil, ha' ton konhob' Bet-seán, konhob' Ibleam, konhob' Dor, konhob' Endor, konhob' Taanac yeb' konhob' Meguido, yeb' oxeb'xa konhob' ayko yinh wonhan.^f

¹²Yaja' mach ok hunteq'an konhob' tu' yu eb'naj titna yinh ya' Manasés, yuto eb'naj cananeo ay b'ey tu', islinhb'a isb'a eb'naj sata eb'naj Israel, yuxin mach yu yinilo eb'naj eb'naj, hak tu' xin yu iskankano eb'naj cananeo b'ey hunteq'an konhob' tu'. ¹³Haxa yet yiq'nikanh yip eb'naj Israel, isq'anni eb'naj tato chitohlawi eb'naj cananeo tu' tet eb'naj, yaja' machi tzumb'elaxilo eb'naj yu eb'naj.

¹⁴Yalni eb'naj titna yinh ya' José tet ya' Josué haka' ti':

—¿Tzet yinh xin hune' suertehalnhe maxawayo yinh kotx'otx'anh? Hanhonhti'anh ayayo isyaxil Komam Jahawil jib'anhanh, yu hune' tu' yuxin niman kob'isilanh yu Komam, xhi eb'naj.

^e 17:4 Nm. 26:33; 27:1-7 ^f 17:11 1Sam. 31:10

¹⁵Istaq'wi ya' Josué tet eb'naj:

—Yu kaw nimankano heb'isil, machi xin ch'eliko tx'otx' chawal tx'otx' teyinh yettik'a ya' Efraín hechah hemajuloj, ahanhweto xol q'eb'talaj sat istx'otx' eb'naj ferezeo yeb' eb'naj refaíta, kat heq'ajnayoy te te', xhi ya' Josué tet eb'naj.

¹⁶Istaq'wi eb'naj tet ya' Josué tu', yalni eb'naj:

—Yinh kaw yeli, mach chab'e tx'otx' chawal tx'otx' ti' jinhanh, yaja' wal eb'naj cananeo ayayo sat ak'al, ay iscarruaje eb'naj ch'en; hak tu' xin anma ay b'ey konhob' Bet-seán yeb'paxo yaldeahil; haktik'apax tu' anma ay yul hokan Jezreel, xhi eb'naj.

¹⁷Istaq'wi ya' Josué tet eb'naj titna yinh ya' José, ha' ton eb'naj Efraín yeb' eb'naj Manasés haka' ti':

—Hex ti' kaw niman heb'isil yeb' xin kaw ay heyip, yuxin mach hunnhe majan hetx'otx' chechah. ¹⁸Wal xin chi'okpaxkano tx'otx' q'eb'tala tu' heyu, kat yoknipaxiko te' q'eb'taj tu' heyu, yaja' wal eb'naj cananeo ay b'ey tu', waxanhka kaw ay yip eb'naj yeb' ay iscarruaje eb'naj, chetzumb'elo eb'naj b'ey tu', xhi ya' Josué tet eb'naj.

Istx'otx' hunmajanxa eb'naj Israel

18 ¹Hayet ischahnikano eb'naj Israel tx'o tx'otx', iskutxb'an isb'a eb'naj b'ey konhob' Silo, yanikanh eb'naj Tabernáculo, b'ay chis-kutxb'a isb'a anma yeb' Komam. Sunil anma mach Israeloj ay b'ey tu' yakto isb'a yalanh ischejb'anil eb'naj Israel,² yaja' xin ayto huj majanxa eb'naj Israel tu' maxhto chischah ismajul.

³Yuxin yal ya' Josué tet eb'naj Israel tu' haka' ti': «¿Tzet cheyechma yuxin maxhto chexto ehoyo sat tx'o tx'otx' xayaq' Komam Jahawil teyet, Komam isDiosal hemam icham? ⁴Saywelo oxwanh eb'naj winaj xol hunun majan hex Israel hex ti', kat inchejnitojan eb'naj isb'eytzeno tx'otx', haxa yet chimeltzo eb'naj kat yalni eb'naj wetan tzet yok tx'otx', yunhe chu ispohlaxkanh tx'otx' teyinh. ⁵Ha' xin eb'naj chito ilno tx'otx' tu' hujeb' majan chu ispohnayo eb'naj tx'otx'. Chikankano istx'otx' eb'naj titna yinh ya' Judá yinh yetk'ul-al sur yinh tx'otx' chepohayo tu'; haxa istx'otx' eb'naj titna yinh ya' José chikankano yinh yetk'ulal norte yinh tx'otx' chepohayo tu'. ⁶Hayet xahe-pohkanh tx'otx' yinh ishuj majan, chetz'ib'nhenkano ismohonal tx'otx' kat heyiniti wetan, kat wanayojan suerte sata Komam Jahawil, koDiosal. ⁷Wal eb'naj levita, mach ismajul eb'naj chischah, yuto ha' ismunil eb'naj ha' ton yok eb'naj issacerdotehal Komam. Wal eb'naj heyet Israelal titna yinh ya' Gad yeb' yinh ya' Rubén yeb' yikta majan eb'naj titna yinh ya' Manasés,

§ 18:1 Hune' isTabernáculo Komam Dios yijik'o eb'naj Israel b'ey tx'otx' desierto, Ex. 26:1-37; 27:21; Jue. 18:31. Niman tiempo ek'le iskaxhahil Komam Dios b'ey konhob' Silo. 1Sam. 4:4.

xa'ischah eb'naj ismajul isq'axeb'ik'to ha' Jordán yinh yetk'ulal b'ay chi'ahilo tz'ayik; tx'otx' aq'b'ilkano yu ya' Moisés, ischejab' Komam Dios,» xhi Josué.

⁸Hayet lanhanxa isto eb'naj ispohnoyo tx'otx' tu' yeb' eb'naj chi-tz'ib'nhenayo isnajachil b'ay ch'ek' tx'otx', yalni ya' Josué tu' tet eb'naj: «Asi'we yulaj ismajul sunil tx'o tx'otx' tu', kat hepohnayo tx'otx', lahwi tu' kat hemeltzo b'ey konhob' Silo ti', hak tu' xin chiwayojan suerte sata Komam Jahawil, yinh b'aytet tx'otx' chechah,» xhi ya' Josué tet eb'naj.

⁹Isto eb'naj yilno tx'otx' tu', isb'eytzen eb'naj sunil ismajul tx'otx', ispohnayo eb'naj ej tx'otx' konhob' yinh hujeb' majan, istz'ib'nhenkano eb'naj yul hum b'ay ch'ek' isnajachil; lahwi tu' ismeltzo eb'naj yul campamento b'ey konhob' Silo. ¹⁰Ispohnikanokan ya' Josué tx'otx' yinh suertehal yinh eb'naj Israel tu' hatatik'a yinh hanta chischah hunun majan, sata Komam Jahawil b'ey konhob' Silo.

¹¹Hayet ispohlaxkanh tx'otx' yinh suertehal, ha' eb'naj titna yinh ya' Benjamín ischah istx'otx' yinh b'ab'elal, yaj haka'tik'a isb'isil eb'naj. Aq'lax istx'otx' eb'naj tu' xolb'al istx'otx' eb'naj titna yinh ya' Judá, yeb' eb'naj titna yinh ya' José.

¹²Ha' ismohonal istx'otx' eb'naj tu' yinh yetk'ulal norte, chi'ichiti yinh ha' Jordán, kat yek' yinh yetk'ulal norte yinh konhob' Jericó, kat istopaxo yinh tx'otx' chewal tx'otx' yinh yetk'ulal b'ay chito tz'ayik, kat yelapno yinh tx'otx' desierto Bet-avén, ¹³kat istopaxo b'ey konhob' Luz chihal-laxpaxo Bet-el yinh yetk'ulal sur, kat yayapno b'ey konhob' Atarot-adar b'ey hune' witz yinh yetk'ulal sur yinh konhob' Bet-horón b'ey yalanhaytoj; ¹⁴kat ismeltzo ismohonal tx'otx' tu', kat yek' yinh isk'ul witz yinh yetk'ulal sur ayko satak'ti Bet-horón, kat yapni b'ey Quiriat-baal, chihal-laxpaxo Quiriat-jearim, iskonhob' eb'naj Judá. Ha' ton tu' ismohonal tx'otx' yinh yetk'ulal b'ay chito tz'ayik.

¹⁵Haxa ismohonal tx'otx' yinh yetk'ulal sur chitaichiti b'ey konhob' Quiriat-jearim yinh yetk'ulal b'ay chito tz'ayik, b'ay ay isnuq' ha ha' b'ey konhob' Neftoa. ¹⁶Kat yayapno yinh witz ayko satak'ti hokan yet isk'ahol naj Hinom yinh yetk'ulal norte yinh hokan Refaim. Lahwi tu', kat istopaxo sat hokan Hinom, kat yek'to yinh isk'ul witz Jebús yinh yetk'ulal sur, kat yapnikano b'ey isnuq' ha ha' Rogel, ¹⁷kat ismeltzopaxo ismohonal yinh yetk'ulal norte, kat yelapno b'ey konhob' En-semes, kat istopaxo b'ey konhob' Gelilot ayko satak'ti isk'ul witz Adumín, kat yayapno satla ch'en ch'en yet naj Bohán, isk'ahol naj Rubén, ¹⁸kat yek' yinh witz yinh yetk'ulal norte satak'to wonhan Arabá, kat yayapno yul hokan Arabá.^h ¹⁹Kat yayapno yinh yetk'ulal norte yinh konhob' Bet-hogla, kat yapnikano yinh yetk'ulal norte yinh isq'ab' ha' mar Kachi, kat yapnikano yinh isk'ul ha' Jordán yinh sur. Ha' ton ti' ismohonal tx'otx' yinh yetk'ulal sur.

^h 18:18 Hokan Arabá chal-laxpaxoj Yak'alil isti' ha' Jordán.

²⁰Haxa ismohonal tx'otx' yinh yetk'ulal b'ay chi'ahilo tz'ayik, ha' ton ha' Jordán. Ha' hunteq'an ti' ismohonal tx'otx' chab'il yu eb'naj titna yinh ya' Benjamín.

²¹Ha' xin konhob' ischah eb'naj titna yinh ya' Benjamín, ha' ton hunteq'an konhob' ti': konhob' Jericó, konhob' Bet-hogla, hokan Casis,ⁱ ²²kanhob' Bet-arabá, konhob' Zemaraim, konhob' Bet-el, ²³kanhob' Avim, konhob' Pará, konhob' Ofra, ²⁴kanhob' Quefar-haamoni, konhob' Ofni yeb' konhob' Geba; kab'lahonheb' konhob' tu' yeb' ej yaldeahil.

²⁵Ischahnilo eb'naj konhob' Gabaón, konhob' Ramá, konhob' Beerot, ²⁶kanhob' Mizpa, konhob' Cafira, konhob' Mozah, ²⁷kanhob' Requem, konhob' Irpeel, konhob' Tarala, ²⁸kanhob' Zela, konhob' Elef, konhob' Jebús, ha' ton Jerusalén, konhob' Gabaa, yeb' konhob' Quiriat; 14 (kanhonheb') konhob' tu' yeb' ej yaldeahil. Ha' ton tx'otx' ti' ischalo eb'naj titna yinh ya' Benjamín.

19 ¹Haxa tx'otx' yet iskab' majan ok suerte yinh, ha' eb'naj Israel titna yinh ya' Simeón iq'ni tx'otx'; haka'tik'a xin isb'isil eb'naj hak tu' istx'otx' eb'naj ischah. Ha' xin hanik' ismajul eb'naj Judá aq'lax tet eb'naj Simeón tu'. ²Ha' xin hunteq'an konhob' ischah eb'naj tu'; ha' ton konhob' Beerseba, konhob' Seba, konhob' Molada, ³kanhob' Hazar-sual, konhob' Bala, konhob' Ezem, ⁴kanhob' Eltolad, konhob' Betul, konhob' Horma, ⁵kanhob' Siclag, konhob' Bet-marcabot, konhob' Hazar-susa, ⁶kanhob' Bet-lebaot yeb' konhob' Saruhén; 13 (oxlahonheb') konhob' tu' yeb' ej yaldeahil.

⁷Ischahpaxo eb'naj konhob' Aín, konhob' Rimón, konhob' Eter yeb' konhob' Asán; kanheb' konhob' tu' yeb' ej yaldeahil. ⁸Ischahpaxo eb'naj sunil ej yaldeahil ayko yinhla ishoyanil konhob' tu' masanta b'ey konhob' Baalat-beer, ha' ton konhob' chal-laxpaxo Ramot ay b'ey tx'otx' Neguev. Ha' ton xin tx'otx' aq'lax tet eb'naj titna yinh ya' Simeón, haka'tik'a isb'isil eb'naj, hak tu' tx'otx' ischah eb'naj. ⁹Ha' yul ismajul eb'naj titna yinh ya' Judá, aq'lax ismajul eb'naj titna yinh ya' Simeón, yuto eb'naj titna yinh ya' Judá tu', kaw niman istx'otx' eb'naj ischah, yuxin yinh ismajul eb'naj Judá el ismajul eb'naj titna yinh ya' Simeón.

¹⁰Haxa tx'otx' yet isyox majan ok suerte yinh, ha' eb'naj Israel titna yinh ya' Zabulón iq'ni tx'otx'; haka'tik'a isb'isil eb'naj, hak tu' istx'otx' eb'naj ischah. Ha' ismohonal istx'otx' eb'naj chitaichiti b'ey konhob' Sarid, ¹¹kat isto yinh yetk'ulal b'ay chi'ahilo tz'ayik masanta b'ey konhob' Marala, ch'ek'paxo b'ey konhob' Dabeset, kat yapnikano yinh ha' nich'an ha' ay satak'ti Jocneam. ¹²Chi'ichipaxti b'ey konhob' Sarid tu', kat isto ismohonal tx'otx' yinh yetk'ulal b'ay chi'ahilo tz'ayik masanta b'ey konhob' Quislot-tabor, kat xin yek'paxo b'ey konhob' Daberat, kat yahapno b'ey

ⁱ 18:21 Hokan Casis chalpaxilo Emec Casis.

konhob' Jafía, ¹³ha' b'ey tu' chitopaxo ismohonal tx'otx' yinh yetk'ulal b'ay chi'ahilo tz'ayik, kat yek' b'ey konhob' Gat-hefer, kat yek'paxo b'ey konhob' Ita-cazín, kat yapnikano b'ey konhob' Rimón, ishoyini isb'a yinh konhob' Nea. ¹⁴Haxa ismohonal yinh yetk'ulal norte, chitaek' ishoyo' b'ey konhob' Hanatón kat yelapno yul ak'al ay b'ey konhob' Jefte-el. ¹⁵Xol konhob' tu' ayko konhob' Catat, konhob' Naalal, konhob' Simrón, konhob' Idala yeb' konhob' Belén; ay kab'lahonheb' konhob' yeb' ej yaldeahil. ¹⁶Ha' ton tx'otx' tu' aq'lax ismajulo eb'naj titna yinh ya' Zabulón, yeb' hunteq'an konhob' yeb' ej yaldeahil.

¹⁷Haxa tx'otx' yet iskanh majan ok suerte yinh, ha' eb'naj Israel titna yinh ya' Isacar iq'ni tx'otx'; haka'tik'a isb'isil eb'naj tu', hak tu' istx'otx' eb'naj ischah. ¹⁸Ha' sat istx'otx' eb'naj tu' ayayo hunteq'an konhob' ti'; konhob' Jezreel, konhob' Quesulot, konhob' Sunem, ¹⁹konhob' Hafaraim, konhob' Sihón, konhob' Anaharat, ²⁰konhob' Rabit, konhob' Quisió, konhob' Abez, ²¹konhob' Remet, konhob' En-ganim, konhob' Enhada yeb' konhob' Bet-pases. ²²Chitaxin apni ismohonal tx'otx' tu' b'ey konhob' Tabor yeb' b'ey konhob' Sahazima yeb' b'ey konhob' Bet-semes, kat iskachnakanapno yinh ha' Jordán; ¹⁶ (wajlanheb') konhob' tu' yeb' ej yaldeahil. ²³Ha' tx'otx' tu' yeb' ej konhob' yeb' ej yaldeahil aq'laxkano ismajuloj eb'naj titna yinh ya' Isacar.

²⁴Haxa tx'otx' yet isho' majan ok suerte yinh, ha' eb'naj Israel titna yinh ya' Aser iq'ni tx'otx'; haka'tik'a isb'isil eb'naj, hak tu' istx'otx' eb'naj ischah. ²⁵Ha' xin sat istx'otx' eb'naj tu', ayayo hunteq'an konhob' ti'; konhob' Helcat, konhob' Hali, konhob' Betén, konhob' Acsaf, ²⁶konhob' Alamelec, konhob' Amad, konhob' Miseal, chitaxin apni b'ey witz Carmelo yinh yetk'ulal b'ay chito tz'ayik yeb' b'ey konhob' Sihor-libnat. ²⁷Haxa ismohonal tx'otx' xin chishoy isb'a yinh yetk'ulal b'ay chito tz'ayik masanta b'ey konhob' Bet-dagón, kat isto yinh yetk'ulal norte kat yapni yinh istx'otx' eb'naj Zabulón, kat yek' b'ey hokan Jefte-el yeb' b'ey konhob' Bet-emec yeb' b'ey konhob' Neiel, kat yek'to satak'to konhob' Cabul yinh yetk'ulal norte. ²⁸Yuxin chi'ek' ismajatoj konhob' Hebrón, konhob' Rehob, konhob' Hamón, yeb' konhob' Caná, masanta chi'apni yinh niman konhob' Sidón. ²⁹Chilahwi tu', kat yek' ismohonal tu' ishoyno konhob' Ramá masanta chi'apni b'ey hune' konhob' hoyaniko k'ub' yinh, ha' ton Tiro, tohol yapni yinh konhob' Hosa, kat apni yinh ha' Niman mar b'ey tx'otx' yetto Aczib, ³⁰yeb'paxo b'ey konhob' Uma, konhob' Afec yeb' konhob' Rehob; ha' ej konhob' tu' ²² (kab' iskawinaj) yinh sunil, yeb'paxo ej yaldeahil. ³¹Ha' tx'otx' tu' aq'laxkano tet eb'naj titna yinh ya' Aser yeb' hunteq'an konhob' yeb' ej yaldeahil.

³²Haxa tx'otx' yet iswaj majan ok suerte yinh, ha' eb'naj Israel titna yinh ya' Neftalí iq'ni tx'otx'; haka'tik'a isb'isil eb'naj, hak tu' istx'otx' eb'naj ischah. ³³Ha' istx'otx' eb'naj tu' chitaek' tx'otx' b'ey konhob' Helef

yeb' b'ey konhob' Alón-saananim yeb' b'ey konhob' Adami-neceb yeb' b'ey konhob' Jabneel, masanta b'ey konhob' Lacum, ch'elapno ismohonal tx'otx' yinh ha' Jordán. ³⁴Haxa ismohonal tx'otx' yinh yetk'ulal b'ay chito tz'ayik chi'ichitij b'ey konhob' Aznot-tabor, kat yapni b'ey konhob' Hucoc, yuxin ha' yinh yetk'ulal sur, ha' yinh istx'otx' eb'naj titna yinh ya' Zabulón chi'ek' ismohonal tx'otx' haxa yinh yetk'ulal b'ay chito tz'ayik, ha' xin yinh istx'otx' eb'naj Aser chi'ek' ismohonal tx'otx'. Haxa yinh yetk'ulal b'ay chi'ahilo tz'ayik chi'ek' ismohonal tx'otx' b'ey istx'otx' eb'naj Judá, kat apni b'ey ha' Jordán. ³⁵Ha' xin hunteq'an konhob' ayko isk'ub'al, ha' ton konhob' Sidim, konhob' Zer, konhob' Hamat, konhob' Racat, konhob' Cineret, ³⁶konhob' Adama, konhob' Ramá, konhob' Hazor, ³⁷konhob' Cedec, konhob' Edrei, konhob' En-hazor, ³⁸konhob' Irón, konhob' Migdal-el, konhob' Horem, konhob' Bet-anat yeb' konhob' Bet-semes; 19 (b'alonhlahonheb') konhob' tu' yeb' ej yaldeahil. ³⁹Ha' ton tx'otx' yeb' hunteq'an konhob' ti' yeb' ej yaldeahil ischah eb'naj titna yinh ya' Neftalí. Haka'tik'a isb'isil eb'naj hak tu' istx'otx' eb'naj ischah.

⁴⁰Haxa tx'otx' yet ishuj majan ok suerte yinh, ha' eb'naj Israel titna yinh ya' Dan iq'ni tx'otx'; haka'tik'a xin isb'isil eb'naj, hak tu' istx'otx' eb'naj ischah. ⁴¹Ha' xin hunteq'an konhob' ayayo sat istx'otx' eb'naj ischah tu', ha' ton konhob' Zora, konhob' Estaol, konhob' Ir-semes, ⁴²konhob' Saalabín, konhob' Ajalón, konhob' Jetla, ⁴³konhob' Elón, konhob' Timnat, konhob' Ecrón, ⁴⁴konhob' Elteque, konhob' Gibetón, konhob' Baalat, ⁴⁵konhob' Jehud, konhob' Bene-berac, konhob' Gat-rimón, ⁴⁶konhob' Mejarcón, yeb' konhob' Racón, yeb' tx'otx' ayko satak'ti konhob' Jope. ⁴⁷Yaja' istx'otx' eb'naj titna yinh ya' Dan ischah tu', machi eliko tx'otx' yinh eb'naj, yuxin ahto eb'naj yaq'a'ko howal yinh konhob' Lesem; ispotx'nikamo eb'naj sunil anma ay b'ey tu', yokkano tx'otx' yu eb'naj, iskankano eb'naj b'ey tu'. Ishelni eb'naj isb'i hune' konhob', yaniko eb'naj Dan isb'ihó tx'otx', haka' isb'i ismam icham eb'naj. ⁴⁸Ha' ton tx'otx' ti' yeb' ej konhob' yeb' ej yaldeahil ischah eb'naj titna yinh ya' Dan ismajuloj; haka'tik'a isb'isil eb'naj, hak tu' istx'otx' eb'naj ischah.

⁴⁹Lahwi ispholaxkanokanh tx'otx' yinh hunun majan eb'naj Israel tu', yaq'ni hunun majan eb'naj istx'otx' ya' Josué, isk'ahol ya' Nun. ⁵⁰Haka'tik'a yu yalníkano Komam Jahawil, aq'lax konhob' Timnat-sera tet ya', konhob' ay b'ey tx'otx' chewal tx'otx' yul ismajul eb'naj Efraín, yuto ha' konhob' tu' q'anb'il yu ya' Josué. Iswatx'enkanh ya' hune' konhob' tu', ha' b'ey tu' ehayo ya'.

⁵¹Ha' sunil tx'o tx'otx' tu', isphokanh ya' sacerdote Eleazar yeb' ya' Josué yeb' eb'naj iswi'ehal konhob' yinh suerte yinh hunun majan eb'naj Israel, pohlaxkanh b'ey konhob' Silo sata Komam Jahawil, sata isti' isTabernáculo Komam, b'ay chiskutxb'a isb'a eb'naj Israel; hak tu' yu islahwi isphohnikanokanh eb'naj tx'otx' yinh.

Hunteq'an konhob' b'ay chi'apni anma iskolo' isb'a

20 ¹Istzotel Komam Jahawil tet ya' Josué, yalni Komam haka' ti':
²«Tzotelanh tet eb'naj Israel kat hawalni tato chissayilo eb'naj hunteq'an konhob' b'ay chiskol isb'a anma, haka'tik'a yu walnikanojan tet ya' Moisés. ³Tato ay hunu mak chipotx'nikamo hunu yet anmahil, mach xin nab'ilo yu chiyaq'ni kamoj, chisje isto iskolno isb'a yul hunu konhob' tu', yunhe machi maq'laxkamo yu mak ayto yu isb'a yeb' mak chimaq'laxkamo tu'.

⁴«Ha' mak chito iskolo' isb'a yul konhob' tu' chi'apni isti' ispultahil konhob', kat yalni tet eb'naj icham winaj chi'ijb'ali tzet yinh yuxin chi'apni b'ey tu', kat ischahniko eb'naj yul konhob', kat yaq'ni eb'naj b'ay chi'ehayoj. ⁵Ta xin ha' hunu mak ayto yu isb'a yeb' naj aq'laxkamo chi'apni istzujuyo naj, eb'naj ichamta winaj ay ismunil yijb'ali mach chako eb'naj naj yul isq'ab' naj, yuto mach nab'ilo yu naj yet yaq'nikamo yet anmahil tu', machi xin howal xol yet yalanhtokanoj. ⁶Chixin kankano naj iskolo' isb'a yul konhob' tu', masanto yet chi'ok naj sata konhob' Israel yu yil-laxi tzet chi'eliko naj, yeb' masanto yet chikam naj yahawil sacerdote ayko yinh ismunil yinh hune' tiempohal tu'; lahwi tu' xayu ismeltzo naj yatut yul iskonhob' b'ay elnakanh tu',» xhi Komam.^j

⁷Hak tu' yu issaynilo eb'naj Israel hunteq'an konhob' b'ay chiskol isb'a eb'naj; issaynilo eb'naj konhob' Cedés b'ey Galilea b'ey tx'otx' chawal tx'otx' yul ismajul eb'naj titna yinh ya' Neftalí, yeb' konhob' Siquem ay b'ey tx'otx' chawal tx'otx' yul ismajul eb'naj titna yinh ya' Efraín, yeb' konhob' Quiriat-arba, chihal-laxpaxo Hebrón ay b'ey tx'otx' chawal tx'otx' yul ismajul eb'naj titna yinh ya' Judá. ⁸Haxa b'ey isq'axeb'ik'to ha' Jordán yul ak'al sat tx'otx' desierto yinh yetk'ulal b'ay chi'ahilo tz'ayik yinh tx'otx' Jericó, issayilo eb'naj konhob' Beser ayko yul ismajul eb'naj titna yinh ya' Rubén. Haxa b'ey tx'otx' Galaad issayilo eb'naj konhob' Ramot ayko yul ismajul eb'naj titna yinh ya' Gad. Haxa b'ey tx'otx' Basán issayilo eb'naj konhob' Golán ayko yul ismajul eb'naj titna yinh ya' Manasés. ⁹Ha' hunteq'an konhob' tu' issayilo eb'naj yunhe iskolni isb'a anma Israel tu' yeb' anma mach Israelo ay xol eb'naj. Ha' b'ey tu' chito iskolo' isb'a hunu mak mach nab'ilo yu chismaq'nikamo hunu yet anmahil, yunhe matzet chi'utelax yu hunu mak ayto yu isb'a yeb' mak chimaq'laxkamo tu' yalanhto maxhto chi'ok sata konhob' yu yil-laxi yinh tzet chi'elikoj.

Ej konhob' yet eb'naj levita

21 ¹Eb'naj yahawil yinh hunun nhahil anma titna yinh ya' Leví, to eb'naj isk'atanh ya' sacerdote Eleazar yeb' isk'atanh ya' Josué

yeb' isk'atanh eb'naj iswi'ehal yinh eb'naj Israel, ²b'ey konhob' Silo ay yul ismajul Canaán, yalni eb'naj haka' ti': «Yalkano ya' Moisés yu Komam Jahawil tato chi'aq'lax hunteq'an konhob' jetanh b'ay chonhehanh, yeb' b'ay chilow konoq'an», xhi eb'naj. ³Hak tu' xin yu yaq'ni eb'naj Israel hunteq'an konhob' yeb' hunteq'an b'ay chilow isnoq' eb'naj levita yinh ej ismajul, haka'tik'a yu yalnikano Komam Jahawil.^k

⁴Yinh b'ab'elal xin ha' yib'anh eb'naj levita titna yinh naj Coat ayk'ay suerte; ha' xin eb'naj Coat, eb'naj titna yinh ya' sacerdote Aarón ischah eb'naj 13 (oxlahonheb') konhob', hunteq'an konhob' tu' ayko yul ismajul eb'naj Judá, yeb' yul ismajul eb'naj Simeón, yeb' yul ismajul eb'naj Benjamín.^l ⁵Haxa hunteq'anxa eb'naj yuninal naj Coat xin aq'lax 10 (lahonheb') konhob' tet eb'naj yinh suertehal. Hunteq'an konhob' tu' ayko yul ismajul eb'naj Efraín, yeb' yul ismajul eb'naj Dan, yeb' yul ismajul eb'naj Manasés.

⁶Ha' xin hunmajanxa eb'naj levita titna yinh ya' Gersón aq'lax 13 (oxlanheb') konhob' tet eb'naj yinh suertehal. Hunteq'an konhob' tu' ayko yul ismajul eb'naj Isacar, yeb' yul ismajul eb'naj Aser, yeb' yul ismajul eb'naj Neftalí, yeb' yul ismajul eb'naj Manasés ay b'ey Basán. ⁷Haxa hunmajanxa eb'ya' levita titna yinh naj Merari, aq'lax 12 (kab'lahonheb') konhob' tet eb'naj hatatik'a isb'isil eb'naj. Hunteq'an konhob' tu' ayko yul ismajul eb'naj Rubén, yeb' yul ismajul eb'naj Gad, yul ismajul eb'naj Zabulón.

⁸Hak tu' xin yu yaq'ni eb'naj Israel hunteq'an konhob' tet eb'naj titna yinh ya' Leví yeb' b'ay chilow isnoq' eb'naj, yinh suertehal eb'naj, haka' yu yalnikano Komam Jahawil tet ya' Moisés.

⁹Ha' hunteq'an konhob' chib'ina ti', ha' yul ismajul eb'naj Judá yeb' yul ismajul eb'naj Simeón aya.^m ¹⁰Ha' xin eb'naj levita titna yinh naj Coat, yeb' yinh ya' Aarón ischah hunteq'an konhob' tu', yuto ha' eb'naj chahni b'ab'el, hatatik'a yinh suertehal eb'naj.

¹¹Ha' b'ey chewal tx'otx' yul ismajul eb'naj Judá aq'lax konhob' Quiriat-arba tet eb'naj, ha'tik'a hune' konhob' tu' chal-lax Hebrón, yaq'laxpaxo b'ay chilow isnoq' eb'naj yinhla ishoyanil konhob'. Ha' konhob' Quiriat-arba tu' kaw b'inab'ilkano yu eb'naj Anac, eb'naj nimej istel. ¹²Yaja' wal istx'otx' yeb' ej yaldeahil hune' konhob' tu', aq'b'ilxa ismajulo ya' Caleb, isk'ahol naj Jefone.ⁿ

¹³Yaq'lax konhob' Hebrón tet eb'naj isk'ahol ya' Aarón yeb' b'ay chilow isnoq' eb'naj yinhla ishoyanil. Ha' b'ey konhob' tu' chiskol isb'a eb'naj

^k 21:3 Eb'naj Israel titna yinh ya' Leví, mach istx'otx' eb'naj aq'laxi, Jos. 13:33; 14:4; 18:17, yaja' aq'lax hunteq'an konhob' b'ay chi'eh eb'naj yeb' b'ay chilow isnoq' eb'naj, 48 (waxajeb' yoxk'al) konhob' aq'lax tet eb'naj, Jos. 21:41. ^l 21:4 Eb'naj levita, oxeb' majan eb'naj, hatatik'a ismam icham eb'naj, ha' ton xin eb'naj ti'; eb'naj coatita, eb'naj gersonita yeb' eb'naj merarita, Jos. 21:1-45; Nm. 3:14-37. ^m 21:9 Jos. 21:4 ⁿ 21:12 Jos. 14:13-15

mach nab'ilo yu chismaq'nikamo hunu yet anmahil. Yiq'nipaxo eb'naj hunteq'an konhob' yeb' ej b'ay chilow isnoq' eb'naj; ha' ton xin konhob' Libna, ¹⁴konhob' Jatir, konhob' Estemoa, ¹⁵konhob' Holón, konhob' Debir, ¹⁶konhob' Aín, konhob' Juta, konhob' Bet-semes; b'alonheb' konhob' tu' yinh kab' majan eb'naj Israel.

¹⁷Haxa yul ismajul eb'naj Benjamín, ischah eb'naj isk'ahol ya' Aarón hunteq'an konhob' ti' yeb' b'ay chilow isnoq': konhob' Gabaón, konhob' Geba, ¹⁸konhob' Anatot, konhob' Almón, kanheb' konhob' ischah eb'naj. ¹⁹Yuxin ha' konhob' aq'lax tet eb'naj sacerdote titna yinh ya' Aarón, ¹³(oxlahonheb') yinh sunil, yaq'laxpaxo b'ay chilow isnoq' eb'naj yinhla ishoyanil konhob'.

²⁰Haxa hunmajanxa eb'naj levita titna yinh naj Coat, aq'lax hunteq'an konhob' tet eb'naj yinh suertehal yul ismajul eb'naj Efraín hatatik'a yinh b'al eb'naj.

²¹Ha' b'ey tx'otx' chewal tx'otx' yinh ismajul eb'naj Efraín tu' aq'lax konhob' Siquem tet eb'naj. Ha' yul konhob' Siquem tu', ha' tu' chiskol isb'a eb'naj mach nab'ilo yu chismaq'nikamo hunu yet anmahil. Yaq'laxpaxo konhob' Gezer tet eb'naj, ²²yeb' konhob' Kíbsaim, yeb' konhob' Bet-horón. Kanheb' konhob' tu' aq'lax tet eb'naj yeb' b'ay chilow isnoq' eb'naj yinhla ishoyanil.

²³Haxa yul ismajul eb'naj Dan ischah eb'naj hunteq'an konhob' yeb' b'ay chilow isnoq' eb'naj. Ha' ton xin konhob' Elteque, konhob' Gibetón, ²⁴konhob' Ajalón, konhob' Gat-rimón. Ha' tu' ischah eb'naj kanheb' konhob', yeb' b'ay chilow isnoq' eb'naj yinhla ishoyanil.

²⁵Haxa yul ismajul yikta majan eb'ya' Manasés ischah eb'naj kab'eb' konhob' tet eb'naj; ha' ton konhob' Taanac yeb' konhob' Gat-rimón yeb' b'ay chilow isnoq' eb'naj yinhla ishoyanil. ²⁶Yuxin 10 (lahonheb') konhob' ischah eb'naj titna yinh naj Coat, yeb' b'ay chilow isnoq' eb'naj yinhla ishoyanil.

²⁷Haxa eb'naj levita titna yinh ya' Gersón aq'lax kab'eb' konhob' tet eb'naj yul ismajul yikta majan eb'naj Manasés, yaq'laxpaxo b'ay chilow isnoq' eb'naj. Ha' ton konhob' Beestera, yeb' konhob' Golán ay b'ey tx'otx' Basán. Ha' b'ey tu' xin chiskol isb'a mak mach nab'ilo yu chiyaq'nikamo hunu yet anmahil. ²⁸Ha' yul ismajul eb'naj Isacar ischah eb'naj titna yinh ya' Gersón konhob' Cisón, yeb' konhob' Daberat, yeb' b'ay chilow isnoq' eb'naj. ²⁹Ischahpaxo eb'naj konhob' Jarmut yeb' konhob' En-ganim; kanheb' konhob' tu' yeb' b'ay chilow isnoq' eb'naj yinhla ishoyanil. ³⁰Haxa yul ismajul eb'naj Aser ischah eb'naj konhob' Míseal yeb' konhob' Abdón, ³¹yeb' konhob' Helcat yeb' konhob' Rehob; ha' kanheb' konhob' ti' aq'lax tet eb'naj, yeb' b'ay chilow isnoq' eb'naj yinhla ishoyanil. ³²Haxa yinh ismajul eb'naj Neftalí ischah eb'naj konhob' Cedés, ayko yul ismajul Galilea. Ha' b'ey Cades tu' chiskol isb'a eb'naj mach nab'ilo

yu chaq'nikamo hunu yet anmahil. Ischahpaxo eb'naj konhob' Hamot-dor yeb' konhob' Cartán; ha' oxeb' konhob' tu' aq'lax tet eb'naj, yaq'laxpaxo b'ay chilow isnoq' eb'naj yinhla ishoyanil. ³³Yuxin eb'naj levita titna yinh ya' Gersón, 13 (oxlahonheb') konhob' ischah eb'naj yinh sunil, haka'tik'a isb'isil hunun majan eb'naj. Yaq'laxpaxo b'ay chilow isnoq' eb'naj yinhla ishoyanil hunun konhob' tu'.

³⁴Haxa hunmajanxa eb'naj levita maxhto chi'aq'lax yet, eb'naj titna yinh naj Merari, ischah eb'naj kanheb' konhob' yul ismajul eb'naj Zabulón; ha' ton konhob' Joneam, konhob' Carta, ³⁵konhob' Dimna yeb' konhob' Naalal; ha' kanheb' konhob' tu' aq'lax tet eb'naj yeb' b'ay chilow isnoq' eb'naj yinhla ishoyanil. ³⁶Kanheb'paxo xin konhob' aq'lax tet eb'naj titna yinh naj Merari yul ismajul eb'naj Rubén; ha' ton konhob' Beser yeb' konhob' Jahaza, ³⁷konhob' Cademot yeb' konhob' Mefaat; ha' kanheb' konhob' tu' aq'lax tet eb'naj yeb' b'ay chilow isnoq' eb'naj yinhla ishoyanil. ³⁸Kanheb' konhob' aq'laxpaxo tet eb'naj yul ismajul eb'naj Gad, ha' ton konhob' Ramot ay b'ey Galaad, ha' b'ey tu' xin chiskol isb'a mak chimaq'nikamo yet anmahil. Yaq'laxpaxo konhob' Mahanaim, ³⁹konhob' Hesbón yeb' konhob' Jazer; ha' kanheb' konhob' tu' aq'lax tet eb'naj yeb' b'ay chilow isnoq' eb'naj yinhla ishoyanil. ⁴⁰Yuxin ha' eb'naj levita titna yinh naj Merari, 12 (kab'lahonheb') konhob' aq'lax tet eb'naj; haka'tik'a xin isb'isil hunun majan eb'naj hak tu' konhob' aq'lax tet eb'naj.

⁴¹Ha' xin isb'isil sunil konhob' aq'lax tet eb'naj levita tu', 48 (waxaj yoxk'al) konhob' yul ismajul eb'naj Israel. Aq'laxpaxo b'ay chilow isnoq' eb'naj. ⁴²Ha' hunteq'an konhob' ti' nananta yehi. Ay b'ay chilow isnoq' eb'naj tu' yinhla ishoyanil, hak tu' ye hunun konhob'.

Ehkanayo eb'naj Israel sat tx'o tx'otx'

⁴³Hak tu' yu yaq'nikano Komam Jahawil tx'o tx'otx' tet eb'naj Israel, ha' ton sunil tx'otx' yaltekano tet yichmam eb'naj yet yaq'ni b'inaho isb'i. Hak tu' yu yokkano tx'otx' yu eb'naj, yehayo eb'naj sat tx'otx'. ⁴⁴Isyije Komam tzet yalte tet ismam eb'naj; yaq'ni Komam Jahawil aq'ank'ulal tet eb'naj Israel sat istx'otx' tu'. Machi hunu eb'naj chichiwa isk'ul chisje yaniko howal yinh eb'naj, yuto ha' Komam Jahawil anikaniko eb'naj yul isq'ab' eb'naj Israel. ⁴⁵Machi hunu Istzoti' Komam Jahawil mach chiyij isb'a, wal xin sunil yijkano isb'a, haka'tik'a yu yalnikano Komam.

Latz'b'alaxkanh ch'en ch'en mexhahil isti' ha' Jordán

22 ¹Lahwi tu', yawten ya' Josué eb'naj soldado Israel titna yinh ya' Rubén yeb' eb'naj titna yinh ya' Gad yeb' yikta majan eb'naj titna yinh ya' Manasés. ²Yalni ya' tet eb'naj: «Hex ti' malahwi heyijenkano sunil tzet yalkano ya' Moisés ischejab' Komam Jahawil, heyijenpaxo

tzet walan. ³Maxhtik'a heb'ejkano heyuxhta Israel yulb'al hunteq'an tiempo ti', masanto tinanh, wal xin heyije sunil chejb'anile yalkano Komam Jahawil, koDiosal. ⁴Wal tinanh mayijkano isb'a tzet halteb'il-kano yu Komam Dios, Jahawil, yuto sunil eb'naj heyet Israelal ayxako eb'naj yinh tzalahilal, yuxin meltzanhweto b'ay aykanh hemantiado sat hetx'otx' aq'b'ilkano yu ya' Moisés isq'axeb'ik'to ha' Jordán. ⁵Ha' hune' tzet chinq'anan teyete ta cheyije sunil chejb'anile yeb' kuyb'anile aq'b'il-kano yu ya' Moisés, ischejab' Komam Dios, ha' chal yelapno chexahannhe Komam Jahawil koDiosal, kat heb'eyb'alnhen tzet chal Komam, kat heyijen chejb'anile, kat heyok tzujno yintaj, kat hewatx'en tzet chala yinh sunil hek'ul yeb' yinh sunil heyanna,» xhi ya' Josué.

⁶Lahwi tu' xin, isq'annayo ya' Josué isk'ulal Komam Dios yib'anh eb'naj, istaq'likano ya' tet eb'naj, ispaxto eb'naj b'ay aykanh ismantiado.

⁷Ha' yikta majan eb'naj titna yinh ya' Manasés, ha' ya' Moisés aq'nikano istx'otx' eb'naj b'ey tx'otx' Basán; haxa yiktaxa majan eb'naj xin ha' ya' Josué aq'ni istx'otx' eb'naj xol yet Israelal b'ey isq'axeb'ik'ti ha' Jordán yinh yetk'ulal b'ay chito tz'ayik. Ischejnito paxo ya' Josué eb'naj b'ey isq'axeb'ik'to ha' Jordán b'ay aykanh ismantiado eb'naj yet lahwi isq'annikanayo ya' isk'ulal Komam yib'anh eb'naj. ⁸Yalni ya' Josué haka' ti': «Hex ti' chexmeltzo sat hetx'otx' yeb' nimeta q'alomal, yeb' kaw nimankano henoq', yeb' ch'en oro, yeb' ch'en plata yeb' ch'en bronce yeb' ch'en hierro, kaw nimanpaxo xilq'ape cheyitoj. Sunil tzet heyilo tet eb'naj chichiwa isk'ul jinh, chepohkanh teyinh yeb' sunil mak aykano b'ey tu',» xhi ya' Josué.

⁹Hak tu' yu ispohni isb'a eb'naj titna yinh ya' Rubén yeb' eb'naj titna yinh ya' Gad yeb' yikta majan eb'naj titna yinh ya' Manasés yinh hunteq'anxa eb'naj Israel b'ey konhob' Silo ay yul ismajul tx'otx' Canaán, ispaxto eb'naj sat istx'otx' b'ey Galaad, tx'otx' aq'laxkano ismajuloj eb'naj haka'tik'a yu yalnikano Komam tet ya' Moisés.

¹⁰Haxa yet yapni eb'naj Rubén yeb' eb'naj Gad yeb' eb'naj yikta majan eb'naj Manasés b'ey isti' ha' Jordán, yulto ismajul tx'otx' Canaán, iswatx'enkanh eb'naj hune' niman mexha yinh ch'en ch'en yet xahanb'alil b'ey tu'. ¹¹Hayet yab'enilo hunteq'anxa eb'naj Israel tato islatz'b'akanh eb'naj ch'en ch'en ok mexhahil yet xahanb'al b'ey ismohonal tx'otx' Canaán isti' ha' Jordán yul ismajul hunteq'anxa eb'naj Israel. ¹²Hayet yab'enilo eb'naj tu', iskutxb'aniko isb'a eb'naj b'ey konhob' Silo, yu yahto eb'naj yanoko howal yinh eb'naj tu'.^o

¹³Yaja' yet yalanhto maxhto chito eb'naj, ischejnito eb'naj ya' Finees, isk'ahol ya' sacerdote Eleazar b'ey Galaad, b'ay ay eb'naj Rubén yeb' eb'naj Gad yeb' yiktaj majan eb'naj Manasés. ¹⁴Istopaxo 10 (lahonhwanh)

eb'naj iswi'ehal eb'naj Israel yinta ya' Finees tu', hunun eb'naj tu' yahaw yeko eb'naj yinh hunun majan eb'naj Israel.

¹⁵Isto eb'naj sunil b'ey Galaad, b'ay ay eb'naj Rubén yeb' eb'naj Gad yeb' yiktaj majan eb'naj Manasés, yalni eb'naj tet eb'naj haka' ti':

¹⁶—Sunil eb'naj Israel iskutxb'ako isb'a sata Komam Jahawil, konhis-chejnitijan eb'naj jalnojanh teyeyet haka' ti':

—¿Tzet yinh maxewatx'e hune' kaw tx'oj yinh Komam Jahawil ko-Diosal, hanhonh Israelonh ti'? ¿Tzet yinh xin heb'ejkano Komam Dios, helatz'b'akanh ch'en ch'en ok mexhahil yet xahanb'al, heyanko heb'a manhk'omal tet Komam? ¹⁷¿Tom hanik'nhe istx'ojal yu b'ey konhob' Peor,^p aytopaxiko xin jib'anh tinanh? Wal xin maxhto chikosajnh kob'a yalanh isya'tajil hunteq'an tu'. Kaw xin tx'i'al jet Israelal kam koxol hanhonh konhiskonhob'onh Komam ti' yu hune' istx'ojal tu'. ¹⁸¿Tom hanik'nhe hune' tu' yul hesat, yuxin cheb'ejkano Komam tinanh?

»Tato chexok manhk'omal tet Komam, yet hekal chitit ishowal jinh hanhonh Israelonh ti'. ¹⁹Tato chetxumu ta mach chu heyinayo heb'a tet Komam sat tx'o tx'otx' hechah ti', tonhwe b'ey tx'otx' yet Komam b'ay aykanh istabernáculo Komam, kat hechahni hetx'otx' koxolanh. Yaja' xin mach cheyako heb'a manhk'omal tet Komam yeb' xin jetanh, chewatx'en hunxa ch'en ch'en mexhahil yet xahanb'al, yintajilo ch'en yet Komam Jahawil, koDiosal. ²⁰Nawetij yet yaniko ismul naj Acán, isk'ahol naj Zera, yet yiniti naj hunteq'an yalkano Komam ta chitanhtzelaxkaniloj, yu hune' istx'ojal iswatx'e naj tu' yuxin tit ishowal Komam jinh kosunil hanhonh Israelonh ti'. ¡Machnhetaj xin naj Acán kam yu ismul tu'! xhi eb'naj.

²¹Istaq'wi eb'naj Rubén yeb' eb'naj Gad yeb' yikta majan eb'naj Manasés tet eb'naj iswi'ehal eb'naj Israel tu' haka' ti':

²²—Komam Jahawil, isDiosal tzet chihal-lax diosal yohta Komam tato maxhtaj yu jokanh manhk'omal tet Komam, maka yu kopohnilo kob'ahanh yinh Komam yuxin kowatx'ehanh hune' ti'; wal xin yohta Komam, chixin yaq' Komam heyohtanhe'. Yaja' ta yu jokanh manhk'omal chikowatx'enanh istx'ojal sata Komam, machojab' cheyaq' nimank'ulal jinhanh. ²³Tato kowatx'ehanh hune' ch'en mexha yu kohek'nilo ko-b'ahanh yinh Komam maka yu konhusnihanh no noq' yinh xahanb'alil, maka yu jaq'nihanh ixim trigo koyeb'alq'ab'ojanh, maka yu jaltenanh xahanb'al yet aq'ank'ulal; yinh haka' tu' yaq'ab'ayo Komam ishowal jib'anhanh.

²⁴»Wal xin kowatx'ekanhanh hune' ch'en mexha ti', yuto mach chijochehanh tato chiyal heyuninal yet b'aq'inh tet juninalanh haka' ti': “Hex ti', machi heyok yinh Komam Jahawil, koDiosalanh hanhonh Israelonh ti'anh. ²⁵Ha' Komam Dios aniko ha' Jordán mohonal jinhanh yeb' hex

Israel titna yinh ya' Rubén yeb' hex titna yinh ya' Gad, yuxin hex ti' machi heyok yinh Komam Dios,” xhitaxka eb'naj. Hak tu' xin matxa yelapno Komam Dios yul sat juninalanh yu tzet chiyal heyuninal tu'.

²⁶»Yuxin ok yinh konab'alanh kolatz'b'ankanhanh ch'en ch'en mexhahil ti', yaj maxhtaj yu konhusnihanh xahanb'al, maka yu jaltenanh hunuxa xahanb'al tet Komam. ²⁷Wal xin kowatx'ehanh hune' ti' yu yaq'ni isb'a testigohal jinhanh yeb' hex, yeb' xol juninalanh yeb' heyuninal yet b'aq'inh, tato chu jinipaxayo kob'ahanh tet Komam Dios, yeb' jokanh sata Komam yu konhusnihanh koxahanb'alanh, yeb' jaq'nihanh xahanb'al chitohlan komulanh, yeb' xahanb'al yet aq'ank'ulal; hak tu' xin mach chu yalni heyuninal yet b'aq'inh haka' ti': “Hex ti' machi heyok yinh Komam Dios,” xhitaxka.

²⁸»Yuxin kotxumanh tato ay mak chihalni jetanh haka' tu', maka tet juninalanh yet b'aq'inh, chonhtaq'wihanh tet haka' ti': “Ilwek'anab'i, ha' eb'ya' komam ichamanh latz'b'ankanh ch'en ch'en haka' mexha, yaja' maxhtaj yu konhusnihanh no noq' yinh xahanb'alil maka yu jaltenanh koxahanb'alanh, wal xin to yu yokniko yaq'ni isb'a jinhanh, koxolanh yeb' hex,” konhchihanh tet. ²⁹Ha'ojab' Komam Dios chikolwa jinhanh, haxinwal mach chonhokanh manhk'omal tet Komam, kat kopohnilo kob'ahanh yinh Komam chikowatx'enkanhanh hunuxa mexha b'ay chikonhusanh no noq' xahanb'alil, maka b'ay chijaltehanh sat ixim trigo koyeb'alq'ab'ehalanh, maka hunuxa xahanb'al yib'anhilo ismexhahil xahanb'al yet Komam ayko sata isti' ispultahil isTabernáculo Komam, xhi eb'naj.

³⁰Hayet yab'en ya' sacerdote Finees yeb' eb'naj iswi'ehal konhob' Israel yinh tzet yal eb'naj Rubén yeb' eb'naj Gad yeb' yikta majan eb'naj Manasés, hune' tu' kaw ischah iswi' eb'naj yinh tzet yal eb'naj. ³¹Yalni xin ya' Finees, isk'ahol ya' sacerdote Eleazar tet eb'naj Rubén, yeb' eb'naj Gad yeb' eb'naj Manasés haka' ti':

—Tinanh xin, chijohtanhelojanh tato ayko Komam Jahawil koxol, yuto mach ayoko yinh henab'al heyok manhk'omal tet Komam, hak tu' xin machi isya'tajil chiyayti Komam jib'anh hanhoh Israelonh ti', xhi eb'naj.

³²Lahwi tu', istaq'li ya' Finees, isk'ahol ya' sacerdote Eleazar, yeb' eb'naj iswi'ehal yeko yinh konhob' Israel tet eb'naj Rubén yeb' eb'naj Gad; yel eb'naj b'ey Galaad tu', isto eb'naj b'ey Canaán. Yalni eb'naj ispaj tet eb'naj b'ey tu' yinh tzet elikoj. ³³Hayet yab'en eb'naj yinh tzet yal eb'naj tu', kaw ischah iswi' eb'naj, yok eb'naj yanoko ismay Komam Jahawil, matxa xin tzet yal eb'naj isto yanoko howal yinh eb'naj yeb' yetanto istx'otx' eb'naj Rubén yeb' eb'naj Gad. ³⁴Yaniko eb'naj titna yinh ya' Rubén yeb' eb'naj titna yinh ya' Gad hune' b'ihe chalni haka' ti': «Ha' ch'en latz'b'ab'ilkanh mexhahil ti', ha' ch'en ayko koxol, chaliloj tato ha' Komam Jahawil koDiosal kosunil,» xhikoj.

3. ISLAHOB'AL TZOTI' YAL YA' JOSUÉ YEB' HAL-LAX CHEJB'ANILE YINH ISKAYELAL

(23:1—24:33)

Ya' Josué yaq' ya' kuyb'anile tet eb'naj Israel

23 ¹Yet tx'i'alxa hab'il yaq'ni Komam Dios xewilal tet eb'naj Israel; matxa howal yaq'le eb'naj yeb' eb'naj ayko ishowal yinh; wal ya' Josué tu' kaw ichamxa ya'. ²Ischejni ya' Josué tu' iskutxb'anoko isb'a sunil eb'naj Israel; eb'naj ichamtaxa xol eb'naj, yeb' eb'naj iswi'ehal konhob', yeb' eb'naj juez, yeb' eb'naj yahawil konhob', yalni ya' tet eb'naj haka' ti': «Haninti'an kaw icham inxahan, kaw ayxa intiempohalan; ³hex ti' xaheyila tzet xa'iswatx'e Komam Jahawil koDiosal yinh hunteq'an konhob' islinhb'a isb'a yaniko howal teyinh, ha' xin Komam aq'ni howal heseleloj. ⁴Xa'inpohkanhan sunil tx'o tx'otx' ti' hatatik'a heyinhb'al teyet hunun majan hex Israel ti', yaja' machnhetaj tx'otx' xakonhq'oji yinh, wal xin inpohpaxkanhan tx'otx' maxhto chonhq'oji yinh; ha' ton tx'otx' chi'ichiti yinh ha' Jordán masanta chi'apni yinh ha' Niman Mar yinh yetk'lulal b'ay chito tz'ayik. ⁵Ha' xin Komam Jahawil koDiosal chi'inilo hunteq'an anma ay sat tx'otx' tu' tesataj, kat yokkano tx'otx' heyu haka' yu yalnikano Komam Jahawil koDiosal.

⁶»Aweko yinh hek'ul heyijen yeb' heb'eyb'alnhen sunil tzet tz'ib'nhe-b'ilkano yul hum yet chejb'anile aq'b'ilkano yu ya' Moisés; chu heyijeni, mach chehek'ilo heb'a yinh hewatx'q'ab' yeb' yinh hemekq'ab'. ⁷Mach chesomto heb'a yeb' hunteq'an konhob' kankano texol ti', mach cheyiyo heb'a tet hunteq'an tzet chal anma tu' isdiosal, mach chexok yijemal tet, mach chu heyaq'ni b'inaho isb'i istioxh eb'naj, mach chu heq'anni yinh isb'i istioxh eb'naj. ⁸Wal xin yintanhehojab' Komam Jahawil koDiosal tzujan hex haka'tik'a heye yet yalanhtokanoj masanto tinanh.

⁹»Ha' Komam tzumb'enilo anma ay yul nimeta konhob' tesataj yeb' konhob' kaw aykano yip. Machi hunu mak ti' islinhb'a isb'a yaniko howal teyinh masanto tinanh. ¹⁰Hunch'an hexnhe ti' chetzumb'e mil eb'naj winaj, yuto ha' Komam Jahawil, koDiosal, chi'aq'ni howal heseleloj, haka'tik'a yu yalni teyet. ¹¹Kaw kam cheyil heb'a, ochewe Komam Jahawil, koDiosal, ¹²yuto tato chehek'ilo heb'a yinh Komam, kat hesomnito heb'a yeb' hunteq'an anma ay yul konhob' aytoko texol ti', kat hemohyi yeb'i, chehunb'an heb'a yeb'i; ¹³ta hak tu', ohtanhewelaj tato mach chis-tzumb'elo Komam Jahawil koDiosal hunteq'an anma tu' tesataj; wal xin haka' latz'ab' yehiko eb'naj teyinh yunhe heyayk'ayi, yeb' haka' no' tz'um chi'ayto istel heyichinh, yeb' haka' te' tx'ix chito yul isb'aq' hesat, hak tu' chuko eb'naj teyinh masanto chextanhkanilo sat tx'o tx'otx' kaw k'ul yaq' Komam Jahawil koDiosal teyet b'ay ay hex ti'.

14»Haninti'an, lanhanxa yapni istz'ayikal b'ay chinkaman, chiwochehan cheyohtanhekanilo yinh sunil heyanna yeb' yinh sunil hek'ul tato xayijkano isb'a sunil tzet isk'ulal yaltekano Komam Jahawil jet, machi hunu ti' ch'ek'to yet yijni isb'a. 15Haka'tik'a yijni isb'a sunil isk'ulal yalkano Komam teyinh, hak tu' chu yanipaxti Komam Jahawil koDiosal sunil isya'tajil halb'ilkano yu teyib'anh masanto chexistanhtzekanilo sat tx'o tx'otx' kaw k'ul b'ay ay hex ti', 16tato chemanhk'o ist'inhanil yaq' Komam teyet, kat heto yinta istioxh anma ti' kat heyinayo heb'a tet, kat heyay jahno sataj, yinh haka' tu' chitit ishowal Komam teyinh, kat hetanhtzelaxilo yinh ha'mataj sat tx'o tx'otx' kaw k'ul yaq' Komam teyet ti',» xhi ya' Josué.

Islahob'al tzoti' yalkano ya' Josué

24 1Iskutxb'aniko ya' Josué hunun majan eb'naj Israel b'ey konhob' Siquem, yawtenpaxo ya' eb'naj ichamta winaj Israel, yeb' eb'naj iswi'ehal yeko yinh konhob' Israel, yeb' eb'naj juez, yeb' eb'naj chimunla yinta naj juez; yok eb'naj sunil sata Komam Dios.

2Yalni ya' Josué tet konhob' Israel:

—Hak ti' yalni Komam Jahawil, koDiosal hanhonh Israelonh haka' ti': “Hayet kaw payat, ya' Taré yeb' kawanh isk'ahol, ha' ton ya' Abraham yeb' naj Nacor, eb'ya' heyichmam, ha' b'ey isq'axeb'ik'to ha' niman Éufrates ay eb'ya'. Hayet ay eb'ya' b'ey tu', ha' tet hunteq'an tzet chihal-lax tioxhal chiyiyo isb'a. 3Wawtentijan ya' Abraham heyichmam b'ey tu', winitijan ya' sat tx'otx' Canaán ti', ispitzk'a hune' isk'ahol ya', ha' ton ya' Isaac, ispohchakanh yuninal ya' Isaac tu'. 4Waq'nipaxojan kawanh isk'ahol ya' Isaac tu', ha' ton ya' Jacob yeb' naj Esaú. Waq'nihan tx'otx' chewal tx'otx' ay yul ismajul Seir tet naj Esaú tu', yaja' wal ya' Jacob yeb' yuninal, to eb'naj b'ey Egipto. 5Inchejnitojan ya' Moisés yeb' ya' Aarón b'ey Egipto, wanayojan isya'tajil yib'anh anma ah Egipto masanto apni is-tiempohal winilojan heyichmam tu'. 6Hayet winiltijan eb'naj heyichmam b'ey Egipto, tit eb'naj ah Egipto istzujuyo eb'naj yeb' iscarruaje yeb' ischeh yet howal masanta b'ey ha' Kajinh Mar, 7yahwi eb'naj heyichmam tu' wetan, hanin Yahawilinti'an, wanikojan q'ejholo xolb'al eb'naj yeb' eb'naj ah Egipto, wanitijan ha' mar tu' yib'anh eb'naj, istokano eb'naj xol ha'. Hex ti' ilb'ilxa heyu yinh tzet wutehan eb'naj Egipto.

»Kaw xin tx'i'al hab'il ek' eb'naj heyichmam tu' sat tx'otx' desierto.

8Lahwi tu', winitijan eb'naj yeb' hex sat istx'otx' eb'naj amorreo isq'axeb'ik'to ha' Jordán yinh yetk'ulal b'ay chi'ahilo tz'ayik. Yaniko eb'naj amorreo tu' howal teyinh, yaja' xin wakojan eb'naj yul heq'ab' heq'oji yinh eb'naj, yokkano istx'otx' eb'naj heyu. 9Lahwi tu', istit naj Balac, isk'ahol naj Zipor, isreyal eb'naj moabita yanoko howal teyinh, hex Israel hex ti'. Yanito naj Balac ischejab' yawtenoti naj Balaam, isk'ahol naj Beor,

yunhe kexistz'akti'nhen naj; ¹⁰yaja' mach inchahan kexistz'akti'nhe naj, wal xin tx'i'al el isq'an naj isk'ulal teyib'anh, hak tu' yu kexinkolnilojan yul isq'ab' naj. ¹¹Lahwi tu' heq'axponik'to yib'anh ha' Jordán, heyapni b'ey konhob' Jericó, ha' xin eb'naj ay b'ey Jericó tu' yeb' eb'naj amorreo, yeb' eb'naj ferezeo, eb'naj cananeo, eb'naj hitita, eb'naj gergeseo, eb'naj heveo, eb'naj jebuseo yako eb'naj tu' howal teyinh, yaja' wakojan eb'naj yul heq'ab'. ¹²Eb'naj kawanh rey amorreo, machi kexq'oji yinh eb'naj yu heyespada yeb' yu helit', wal xin haninan watijan hune' xiwkilal xol eb'naj, yuxin elkanh eb'naj teyet. ¹³Haninan waq'an hetx'otx', maxhtaj hex xin hetz'un tz'unub' sat tx'otx', waq'nipaxoan konhob' b'ay kexehi, maxhtaj hex xin hewatx'ekanh. Tinanh kaw k'ul heyehi, cheloh sat te' uva, yeb' te' aceituna, maxhtaj hex xin hetz'unu," xhi Komam.

¹⁴»Yu sunil hunteq'an ti' yuxin ayojab' yelapno Komam Jahawil yul hesat, kat heyijen yinh tzet chal Komam yinh sunil hek'ul yeb' yinh kaw isyelal. Iwelo hunteq'an tzet chihal-lax tioxhal texol, hunteq'an b'ay yiyo isb'a eb'naj jichmam isq'axeb'ik'to ha' Éufrates yeb' b'ey Egipto. ¹⁵Yaja' ta mach choche hek'ul cheyije tzet chal Komam Jahawil xin, sik'lewej mak tet b'ay wal heyijeni, ta ha' tet hunteq'an tioxh b'ay yiyo isb'a heyichmam b'ey isq'axeb'ik'to ha' Éufrates, maka tet isdiosal eb'naj amorreo ay b'ey ti'; wal haninti'an, ha' tet Komam Dios Jahawil b'ay chiwaq' cheja' hin-b'ahan yeb' wixalan yeb' wuninalan, xhi ya' Josué.

¹⁶Istaq'wi sunil konhob' Israel haka' ti':

—Machojab' b'aq'inh chikob'ejkanojanh Komam Jahawil, kat jokanh koyijenojanh tet hunuxa nan diosal. ¹⁷Yuto ha' Komam Jahawil ha' konhinilti b'ey Egipto yeb' komam icham b'ay ayonhiko chejab'oj. Isyeni Komam nimeta k'ayb'alk'ule jet, ha' Komam xin konhk'ub'ani yeb' konhkolni yinh sunil kob'eh b'ayla konhek'i, yeb' yet jek'to yulaj konhob'. ¹⁸Ha' Komam Jahawil xin inipaxilo sunil ej konhob' kosataj, yinipaxilo xin Komam eb'naj amorreo ay b'ey ti' yet juli. Yu sunil tzet iswatx'e Komam tu', yuxin chijiyo kob'ahanh tet Komam, yuto ha' Komam ko-diosal, xhi eb'naj Israel tu'.

¹⁹Yaja' xin yal ya' Josué haka' ti':

—Mach chu heyok heyijeno tet Komam, yuto Komam Jahawil, machi nino istx'ojal yinh Komam; kaw chitit ishowal Komam yet cheyinayo heb'a tet hunuxa dios, mach chaq' nimank'ulal Komam yinh hemul. ²⁰Tato cheb'ejkano Komam Dios, kat heyok heyinoyo heb'a tet hunuxa nan diosal, kaw chi'ok Komam kexiskaja' yinh haka' tu', kat yaniti Komam isya'tajil teyib'anh, kat kexistanhtzeniloj, waxanhka kaw niman isk'ulal xa'iswatx'e Komam teyinh, xhi ya' Josué.

²¹Istaq'wi sunil eb'naj Israel tet:

—Mach hako tu' chijutehanh, wal xin ha' tet Komam Jahawil chiko-ijehanh tzet chala, xhi eb'naj.

²²Yalni ya' Josué:

—Hex cheyaq' heb'a teyinh tato hanhe tet Komam Jahawil b'ay chey-iyo heb'a, xhi ya'.

Istaq'wi eb'naj:

—Hak tu' ye haka' hawalni ti', xhi eb'naj.

²³Yalni ya' Josué:

—Ta hak tu', iwelo sunil hunteq'an tioxh texol, kat heyaniko heyanna yinh Komam Jahawil, koDiosal hanhonh Israelonh ti', xhi ya'.

²⁴Istaq'wi eb'naj Israel:

—Hanhe tet Komam Jahawil chijaq' cheja' kob'ahanh, kat koyijenanh yinh tzet chala, xhi eb'naj.

²⁵Ha' yinh hune' tz'ayik tu', ist'inhb'akano ya' Josué hune' tzoti' tu' yeb' konhob' Israel b'ey konhob' Siquem, yaq'nikano ya' chejb'anile yeb' kuyb'anile tet eb'naj. ²⁶Istz'ib'nhenkano ya' Josué yul hum yet chejb'anile yet Komam Dios. Lahwi tu', ischejni ya' b'al-laxoti hune' ch'en niman ch'en, yanayo ya' ch'en yich hune' te' hih b'ey yamaq'il Yatut Komam.

²⁷Yalni ya' Josué tet sunil anma Israel:

—Ha' hune' ch'en ch'en ti' testigo jinh yinh sunil tzet mayalkano Komam Dios jet. Testigo ch'en teyinh tato mach cheyije tzet maxetaq'wekano tet Komam Dios ti', xhi ya' Josué.

²⁸Lahwi tu', ischejnito ya' Josué hunun majan eb'naj Israel tu' sat istx'otx' chab'ilxa yu.

Iskamikal ya' Josué

²⁹Lahwi tu' xin, iskam ya' Josué, ischejab' Komam Dios, ya' isk'ahol ya' Nun; 110 ishab'ilal ya' yet iskam ya'. ³⁰Mujlax ya' sat istx'otx' ischah b'ey konhob' Timnat-sera b'ey chewal tx'otx', yul ismajul ya' Efraín, yinh isnorthehal witz Gaas. ³¹Eb'naj Israel isyije eb'naj tzet yal Komam Jahawil yulb'al istiemphal ehik'o ya' Josué, yeb' yet aytok'o eb'naj ichamta winaj kantokano yinta ya' Josué, eb'naj ohtanhe sunil tzet iswatx'e Komam Dios yinh anma Israel.

Yet ismujni eb'naj Israel isb'ajil ya' José b'ey konhob' Siquem

³²Ismujlax isb'ajil isnimanil ya' José yiti eb'naj Israel b'ey Egipto. Ismujni eb'naj b'ey konhob' Siquem, b'ey hune' tx'otx' loq'b'il yu ya' Jacob yinh 100 (hok'al) plata tet isk'ahol naj Hamor, ismam naj Siquem. Ha' hune' tx'otx' tu', okkano ismajulo eb'naj titna yinh ya' José.

Iskamikal ya' Eleazar

³³Iskampaxo ya' Eleazar, isk'ahol ya' Aarón. Ismujlax ya' b'ey hune' tzalan sat istx'otx' ya' Finees, isk'ahol ya' Eleazar, tx'otx' aq'lax ismajulo ya' b'ey chewal tx'otx' yinh ismajul eb'naj titna yinh ya' Efraín.